

662/1

ANATOMES PUBLICAE
Anno MDCCV. Stockholmiæ habitæ
LECTIO TERTIA.

Sive
OMNIPOTENTIS
MIRABILIA

Circa
Generationem Humanam,
publico sermone demonstrata

ab
Experientissimo Dno.

JOHANNE VON HOORN

STOCKHOLMIENSE,
Medicinae Doctore Practico, & Coll.
Med. Assess. Dignissimo,

Nunc
suasu quorundam edita,

&
VALETUDINARIO
ACADEMIAE VPSALENSIS
DICATA.

Ovid. Pont. l. II. El. IX.
*Conveniens homini est hominem servare voluptas,
Et melius nulla quaeritur arte favor.*

Upsalis, **typis WERNERIANIS,** Ao. 1709.



In
VALETUDINARIUM
ACADEMIAE UPSALENSIS
EMBLEMA.



*Qualiter ex mediis Phoenix exstare favillis,
Excita nutrici lampade Solis, amat:
Sic, domus alma aegris, ambusta surgis in urbe;
Hoc pietas ardens, quae dedit, usque dabit.*

J. U.

* * *
LAURENTIO ROBERG

Professori Medico Upsal.

JOHANNES VON HOORN M. D.

S. P. D.

Cum secundum saluberrimas & Regias constitutiones, Medicis Stockholmiensibus demandaretur Ao. MDCCV Martio mense, medica & publica humani cadaveris anatomicae, in usum partim tironum artis, qui hac veluti oculari inspectione microcosmi ad occultiores ejus oeconomiam perspicendam initiantur, non aliter ac ad historiam gentium imperiorumque per geographiam introducere juvenes in literariis ludis solemus, partim & in gratiam confluentium spectatorum & civium, qui recordatione fructuosa, licet cum specie horridiuscula viscerum cruentorum conjuncta, sui cognitionem redimere, quam in ludicrae & licentioris comoediae spectaculo alios irridere maluerunt: contigit tum mihi, ut genitalia virorum organa anatomico cultello discernere, eorumque functiones enarrarem. Ubi, quae maxime necessaria erant, & quae praesentes requirere quasi a me videbantur, ut poteram in illa festinatione & tumultu peregi; sed de ulteriore earundem repetitione, vel mansura per impressionem

impressionem etiam in posterum publicatione
minime constituebam. Nam & praevidebam
manifeste, quam forent multa describenda,
quae cum venia, verbis quasi avolantibus, in
sermocinatione ejusmodi proferuntur; im-
pressa vero chartis, nostris hominibus seve-
rioribus indignationem vel fastidium movere
possent, occasionemque dare perversis & ca-
villatoribus, hosce conatus meos traducendi:
& praeterea in scripto, quocunque studio
concinnato, merito tamen a lectoribus desi-
deratum iri animadvertēbam id, quod in illa
demonstratione publica praecipuum erat, at-
tentosque spectantium animos tenebat, inter-
narum demortui corporis partium distincta
expositio: miros enim illos fibrarum, tubulo-
rumque anfractus, quae uno oculorum in-
tuitu capiuntur, repraesentare verbis, di-
sertissimus licet, frustra tentes. Denique cum
in eadem hac anatome publica ab aliis item
claris medicis res non minus momentosae,
quam hae meae essent, pertractatae sint; &
praecipue nobilissimi Archiatri Doctoris Ur-
bani Hierne elegantissima introductoria Ora-
tio, qua sancti illius, olim etiam e longin-
quo religiosi Judaeis adorati, Hierosoly-
mitani templi convenientem cum humani
corporis compage structuram per partes sin-
gulas deducebat, omnium attentionem ap-
plausumque

plausumque promeruisset: videri merito possent, cupidius haecce a me & festinantius promulgari. Interim tamen, cum qualiacunque haecce mea desiderari jam saepius a quibusdam audirem, & praeterea quaedam referrentur quasi dicta a me, sed minus recte percepta, praecipue ab iis, qui in illa auditorum frequentia longius removebantur ab interiore circulo theatri nostri; & denique rem ipsam, mechanicas scilicet partus causas, mereri judicarem, ut in eas a doctis viris inquireretur, imo crederem matronas etiam nostras non illibenter passuras, ut harum rerum circumstantiae sibi demonstrarentur: constitui tandem, mea collectanea revidere, & quae dubia erant insertis observationibus, licet postea a me factis, firmare, & involuta paulo prolixius deducere, usque eo, ut quae ob circumstantium juniorum aures tum transibam, nude hic & detracto velo, in Latina tamen lingua, adeoque ut spero, sine scandalo sisterem Lectori. Nescio enim quomodo in hac lingua tolerabiliora sunt, & accepta jam usu, partium etiam obscenarum vocabula, quae nostra lingua foeda viderentur; saltem nulla verecundius loquentium consuetudine commendata sunt. Potuit itaque neque haec difficultas, quae alium forsitan deterruisset, deterrire me a scribendo, qui ut salu-

taria praecepta obstetriciae artis comprehenderem, traderemque nostris mulieribus, solo saepe rerum usu, non sine quadam temeritate nitentibus, incubui imprimis huic medicinae parti in exteris scholis, & ejus documenta, uti spero, non obscura dedi, tum in scriptis antebac publicatis, tum in aegrotantium tractatione ipsa. Tibi vero, mi Roberg, manuscriptum hoc transmittere volui, non tam eo nomine, quod in praedictae hujus anatomiae occupatione & tu, de corde & cerebro & corporeis causis humanorum affectuum praelegendo, & insuper quae ceteri demonstrabamus viscera praeparando, pars hujus fabulae magna fuisti; quam praecipue propterea, quod cunctanti mihi, dum exspecto ut reliqui sua prius edant, & haesitanti, tu omnino auctor exstitisti, ut non suppresserem hasce schedas meas, neque illorum parentum more, qui impune olim, quos educare nollent, exponebant liberos, & ego hunc ingenii foetum quasi male natum damnare tenebris abjiceremque. Praeterea cum esses mihi a teneris cognitus, studiorum utpote & itinerum comes ac socius, ut transactae inter nos familiaritatis & communium laborum quaecunque monumentum exstaret, desideravi. Ita autem haecce transmitto, ut publici juris facias, & sponsoris instar ac susceptoris

susceptoris hunc natum meum exornes, & naevulos, si qui erunt, patri non animadversos, occultes vel dissimules. Transegi autem cum Eximio vestro typographo Dno. Job: Wernero, ut impressionis sumtus Academiae Nosocomio remitteret; posteaquam enim omnes reditus istius anatomiae, cujus haec dissertatio pars est, jamdudum lubenter praelectores quinque Medici eidem domui concessissent: aequum etiam esse & ipsum, qui ad Academicam societatem non invitatus spectaret, & Upsalensem typographiam sedulo quotidie perficeret, omnibus litterariae istius reipublicae congaudere commodis, adeoque & novo huic valetudinario favere: quod mihi veluti ex cineribus excitari videtur, post luctuosum illud incendium urbis*, non aliter ac in silvis igne adustis novas propullulare plantas & frutices non ante visos, saepe videmus. Satisfecit autem praenominatus typographus facile petitioni meae. Itaque vellem ego, ut non divenderentur exemplaria, sed ut dona offerantur Patronis Nosocomii, tum qui jam sunt, tum qui referri non dedignabuntur in numerum bonorum virorum, desiderantium, ut salubre hoc institutum perficiatur, quod artis medicae culturae plurimum apud nostros adjuventi adlaturum esse saltem ii non desperant, qui tenuibus hujus domus initis

* Anno 1702, d. 15 & 16 Maji

decesse

deesse noluerunt. Nunc certe bonam spem
boni omnes concepimus, posteaquam & au-
ctoritate sua & insigni insuper donatione
robur addidit infirmæ rei, VIR, non concipi-
endis solum, sed & perficiendis egregiis rebus
natus, Illustrissimus Academiae Vestrae Can-
cellarius, Dn. Comes CAROLUS PIPER.

Equidem qui & aliis Academicis studiis,
& huic nostro inprimis lubenter obrectare
solent, eam ferunt & hodierni moris condi-
tionem esse, & ipsius artis medicae naturam,
quæ deterrere potius ab ejus cultura juve-
nes, quam ad illam allicere deberet. Quid
enim, inquiunt, in hac fragilitate humana,
& hac non jam conditione, sed necessitate
quasi brevi pereundi, in hoc denique ferreo
seculo & truculentis odiis mortalium, dum
bello furiatae gentes, agitataeque faculis li-
bertatis speciosae, vel dulcis domini, saevi-
unt in semet ipsas, internecione mutua,
pugnisque Cadmeis; quid tandem juvat
Æsculapicae artis filiolos de valetudinis regu-
lis, de servandi boni habitus scrupulosis prae-
ceptis, de morborum causis in aëre vel aqua
latentibus, denique de vita pharmacis pro-
longanda, esse sollicitos? quid refert, in illa
perditæ luxuriæ & desidia damnosæ, di-
visa & inveterata in hanc nostram vitam
tyrannide, dietæ formulas anxie suspensa-
que

que manu praescribere, negligentibus & fastidiosis? Et ut ista mittantur, quid expectat, instant, ambiguis & occultis distrabi? nam cum valde limitata sit omnis humana scientia: in medicina facienda insuper requiruntur multa, quae simul adesse rarissime contingunt. Vita nostra brevis est, & ars diffusa ac longa, & rerum gerendarum momenta subito praetervolant, & novis grassari experimentis periculo non caret, & perspicacia ingenii saepe fallitur, & denique ut nihil peccetur in his, tamen non est in Medico semper relevetur ut aeger: sed necesse est & aegrum ipsum probe comparatum esse, & qui circumstant domesticos, consanguineos, amicos, peregrinos, & externa plurima alia conspirare quasi in salutem decumbentis. Quotusquisque vero, obsecro, de iis simul omnibus gloriari potest? Ut autem ardua nil detrahant Apollinaris artis pulcritudini, ad hanc tamen solam in eligendo vitae genere circumspicere rarius solemus; sed liberales licet disciplinas, tamen in communes ususvertere & trahere cupimus: haec autem ars suos cultores rarius vel opibus auget, vel voluptuosa vita & otio jucundo beat, vel ad dignitates evehit, maculatque honoribus. Verum ut finiam tandem, licet non usque adeo mirum sit, jacere hanc disciplinam,

ob cognitionem humanae naturae quam tradit, & proximi bonum quod promittit, regibus alioqui, si gloriari licet, & viris sanctis adamatam,*, semper certe dignam & philosopho homine & Christiano, interim tamen ut plane tollatur illa, non fiet unquam. Qui primo posuit medicinae pretium, mortalium sollicitus amor vitae, idem hujus artis decus etiam in posterum conservabit: & insuper excitata a natura videmus omnibus temporibus egregia quaedam ingenia exstitisse, quae huic imprimis disciplinae tractandae incubuere: in qua re non est, ut habet Gallicum proverbium, disputandum de gustu. Sunt, quos juvet, ut inquit Horatius, Lituo tubae permistus sonitus. Virgilii Japis,

Scire potestates herbarum usumq; medendi
Maluit, & mutas agitare inglorius artes.
Carere certe medentum opera plane nequeunt, vel regum classes, vel exercitus, vel urbes populosae, vel habitantes dispersim in vastis provinciis nobiles & plebei; ne bruta quidem animantia, quorum vel incolumitate vel strage saepe constat & agricultura, & res militaris, & opificia oppidanorum, & iis nitens vera illa & genuina mercatura. Recte itaque inter artes huic reipublicae & imperio, utiles bonasque, &

colimus

* Whitaker. de Regib. & Sanctis professione medicis.

colimus hanc disciplinam in Academiis, & clementissimorum regum nostrorum munificentia, qui ad haecce lentiora studia benigne vertere, quos orbi debent, oculos, voluerunt, publica sunt praemia proposita medicinam exercentibus; & ut commodis incrementisq; salutiferae artis consuleretur in commune, in ordinem certumque collegium, regiis munitum privilegiis, acti omnes sumus: ut jam non memorem, quae quotannis distribuuntur stipendia selectis medicinae tironibus, utq; taceam, non indecore alias interserenda titulis laudibusq; incomparabilis HEROIS REGIS CAROLI XII, concessos gravissimis reipub. temporibus tum Laboratorii Stockholmensis philosophicis ignibus, tum ruinis Theatri Anatomici Upsalensis, publicos sumtus. Cumque jam in universum duobus quasi fulcris nitatur & incedat ars medica, theoria & praxi, seu ratione & experientia: utiq; debent & eadem indistracta ab se invicem manere, nec praxis in empiriam circumforaneam abire, nec theoria in commenta opinionum. Debent & eadem mature conjungi, ne tirones artis vel solo constrinae spiritu freti, vel disputationum vento agitati, ad aegrotantium visitationes festinent gloriosi, vel famelici. Et ut verbis forte persuaderi alicui nequeat necessitas conjunctionis ratio-

nem inter & experientiam, exempla saltem
id monstrabunt. Qui in causas inquirunt
efflorescentis medicinae apud Graecos primum,
& Romanos, & Mauros postea, tum conse-
quentibus temporibus apud Italos & Gallos
hodie, Germanicasque gentes, non aliam
praeter hanc invenient. Et qui exteris lu-
benter frequentare regiones nostri solent,
fatebuntur quanto cum artis incremento, &
quanta cum luce publice decumbentium jam
non aedificia, sed palatia verius & templa
celebrentur a Medicis filiisque Medicorum,
Amstelodami & Londini & Parisiis; ut mi-
nora loca vel a nobis remotiora praeteream.
Animadvertent & id, quod majoris est mo-
menti, videlicet quam sint hae gentes sedulae
in indigenis artis subsidiis, & quae in illo-
rum potestate sunt, excolendis; quam insuper
habeant supervacanea, suspecta, vana, etiam
exotica, nobis duro saepe redimenda pretio.
Sed redeo tandem ad ea, quae ad me spectant,
& ad dissertationem meam: quam ut effice-
rem minus languidam, excitatioremque re-
praesentarem, ita hic omnia retuli, ac si al-
loquerer etiam praesentes meos spectatores.
Tu vero, amicorum integerrime, vale.

AD UPSALAM

Hygieinae novas instaurantem aedes, GRATULATIO.

UPsala, Numinibus quondam possessa ve-
tustis,
Intonsumque prius devenerata nemus,
Cum triplici patrium lustrares sedula Divo,
Thuricremis aris, carminibusque solum:
Quis Te perpetuo Divos ardere coëgit,
Mascula flammivomis & dare thura focis?
Scilicet ejestos veteri post sede Penates,
Quassa repentino Numina fluxa metu,
Altera continuis Tibi Numina currere seclis,
Alter Apollo Deus, non peritura, dedit.
Nempe perantiqua Pietas venerabilis urbe
En! sedet, & lituo condecorata manus:
Sanctaque Relligio, fulgenti splendida palla,
Infula cui nitidas ambit amoena comas.
Tumque Themis, frontem limbo velata pu-
dicam,
Exul, in antiquis insidet aequa locis.
Et sua quae pridem meruit delubra vocari,
Excita divino semine, Hygéa potens,
Expectata videt tandem sibi surgere fana,
Fana procellosis non ruitura notis.

Nunc

Nunc sua fatidico scrutatur scrinia vultu
Diva, salutiferum promere Ægnara bonum.
Quin etiam succos, atque auxiliantia morbis
Gramina, quæ patriis, colligit, orta pla-
gis:

Fervidus & valido quo stet medicamine san-
guis,

Quomodo depascens pectoris ignis eat;
Quo pariter, diris urens fervoribus artus,
Tollitur auxilio, mox redi viva, Febris:
Quid faciat somnos, quid hiantia vulnera
claudat,

Sive lues ferrum, pharmaca sive ferat,
Edocet, intentans salientem pollice venam,
Et præbens docta pocula mista manu;
Sicque salutare membris adhibendo medelas,
Corpore ab egroto pallida fata fugat.

Felix illa dies, alboque notanda lapillo,
Upsala, Phœbéam quæ Tibi misit opem!
Altera Numinibus non Te foecundior orbe
Urbs erit, ingenuis tot celebrata viris.
Ut longaeva solet Phoenix, bona fabula Va-
tum,

Affyriis sylvis, unica semper avis,
Textit odorata cumulum quæ fronde Sabaeum,
Et teneris herbis, immoriturque rogo,
Sed mox emeritos artus, in morte reformat,
Et queat ut nasci, concupit ante mori.

Sic

*Sic post Tempia Deum ferali mersa favilla,
Nil ubi vis hominum, flumina fusa nihil,
Pulcrrior exuviis atris, atque ardua surgis,
Pulcraque jam tota stabit in urbe domus;
Et nova, quae Medicae condis, Penetrantia,
Divae,
Nomen ab aeterna posteritate ferent.*

Stockholmiae d. 15 Febr.

1709.

J. LINDER.
M. D.



EMENDANDA.

Pag. 8. lin. 16. quas lege quae. pag. 22. lin. 8. poruisse lege potuisse. pag. 24. lin. 5. quodam lege quoddam. pag. 33. lin. 25. cum uracho adde saltem in brutis. pag. 32. lin. 7. grandiore aliquo animali subintellige equum, nam de eo quadrat similitudo. pag. 70. lin. ult. ejus umbilicum adde spectabat. pag. 93. lin. 14. invehre lege invehit. pag. 96. lin. 11. illo lege illi. pag. 101. lin. 9. quae lege qui. ibid. lin. 12, qui lege quae. pag. 110. lin. 7. innanis lege inanis. pag. 137. lin. 11. qnarum lege quarum. ibidem lin. 23. abdamus lege abundamus.



PRÆLECTIO ET DEMONSTRATIO ANATOMICA

*Quam Holmiae Anno 1705. d. 29. Martii
habuit*

JOHANNES VON HOORN M.D.

* *



Raecipuum quod mihi in
animo proposueram in hac
prælectione & sermocinatione
publica id erat, *AUDITORES*
HONORATISSIMI, ut demon-
strarem vobis, qua ratione foetus ex
claustris maternis in hanc lucem, non
vi propria, vel ope, sed ex aliis agentibus
causis, mechanicè quasi propellatur,
quodq; plane passivè sese habeat in par-
tu. Id, si possem evincere, certe cadet-
tum, quorūdam, imo plurimorum * opi-
nio, quod septimestris partus sit magis
vitalis octimestri. quasi esset octimestris
ob suos conatus, vel ante partum, vel in
ipso, defatigatus, adeoque exhaustis ob
laborem

A

laborem

* *Hipp. de part. oct. cum longa serie Commentator.*

laborem viribus. Cui persuasioni multorum, quamquam sæpius videamus experientiam repugnare, nolo tamen in aliorum sententiis oppugnandis & refellendis promptum, vel emendandis sollicitum me ostendere; sed unicuique virorum doctorum lubenter suam relinquo fovendam opinionem. hoc autem loco vobis gratissimum fore confido, & mihi convenientissimum; si quæ per experientiam edoctus sum circa partum mulieris & foetus exclusionem, clare distincteque ostenderem, quod sequente modo efficere conabor.

Omnibus certe animantibus, quae inter homo principatum merito obtinet, indidit DEUS & ingeneravit naturale, quoddam desiderium se suumque genus conservandi; nam singuli animalem illam œconomiam, vitamque cibo & potu sustinemus, ut quae per manifestas vias, vel insensibilem dictam transpirationem, seu virium dissipationem decedunt corpori omni momento & deteruntur quasi, reparemus: & morbis praeterea ac injuriis externis obsistimus, & praevenire eadem studemus. estque haec prima conservationis ratio. Altera vero ad perennitatem

ennitatem nostram via, consistit in specie propagatione, cujus ope etiam postea, quam vita sumus defuncti, aliquid nobis simile relinquimus orbi. Hujus rei perficiendae gratia, cum requiri videamus marem & foeminam, instructos itidem in eum finem eos animadvertimus suo quemq; apparatu ac supellectili quasi: cujus anatomen ut spectaretis, A. H. interioremq; structuram oculis perciperetis, huc sine dubio, & quidem, ut ex omnium vestrum laeto vultu percipio, praecipue accessistis. Equidem non potuit nobis ita commode hac vice contingere, ut organa utriusq; sexus simul explicata in tabella vobis exponeremus: quemadmodum in publica, quae de simili fere argumento eodem hoc loco ante aliquot annos * habebatur praelectione, factum fuisse, plurimi vestrum forsitan adhuc recordamini. Nos quidem viro- rum partes accurate dissectas hinc demonstrabimus, & quis sequatur usus ex illa ipsa structura docebimus. muliebrium autem locorum & primi nostri domicilii interiora, ne plane vos lateant, ecce, contemplandas vobis illas partes proponimus

A 2

nimus

* a. L. R. Prof. Med. Ulps. Ao. 1697. Febr. mense.

nimus ex aluta molli, ita arte fabrefactas, ut & uteri fundum, & os, & vaginam cum rugis, & ligamenta & cornua dicta, five tubas naturali circiter magnitudine expressa omnia repraesentent; externis hujus visceris partibus omissis anatomica dexteritate, ut innotescant, non indigentibus. Ut autem singuli vestrum rectius haecce possitis percipere, ecce circumferam, sed obstetricibus junioribus praesertim meditanda suaderem, quarum instructioni, si quid ego meis studiis inservire possem, lubentissime id facerem. Maris genitales partes, uti videtis, primum constant virili membro, tum testibus in scroto reconditis, denique tubulis quibusdam five intermediis canalibus, quorum ope & cum supernis abdominis visceribus, communicant, & inter se, quae jam nominavimus. Suntque isti tubuli, spermatica vasa, sic dicta auctoribus, cum tamen cruore plena semper sint, tum ejaculatoria vasa five deferentia, confectam jam genituram continentia: & denique urethra, quae licet continuatio quaedam cervicis vesicae sit, usque ad penis finem elongata, uti videtis, adeoque emittendae omnis

urinae

urinae unica via, tamen & virile semen per exilem hanc, quam quaeso aspici-
 te, carunculam duobus suis praeditam fo-
 raminiulis, seta nigra hic indicatis, e-
 rumpit e seminalibus hisce vesiculis in
 praedictum meatum *: adeoque duplex
 ejus usus est. unde disceptare inter se
 otiosi quidam doctores solent, quisnam
 jam usus sit vel primarius, vel secundari-
 us; ego illum primarium judico, quo &
 omnes indigemus & quotidie. Verum
 singula accuratius explicanda recurrent
 postea. Nunc partibus sic utcunque &
 in antecessum cognitis, ut ordinem in
 dicendo servemus, faciamus nostrae nar-
 rationis initium ab ipsa illa humana ge-
 nitura in uterum delata, tumque de
 conceptu formabimus in animo nostro
 conceptum, porroque cum crescente
 foetu progredientes cum sermone no-
 stro, tandem ad partum perveniemus,
 eumque solo conatu & labore matris
 peragi docebimus. Observare autem hic
 potestis arteriam testicularem, dictam
 praeparantem, ab aortae trunco excur-
 rentem usque ad testiculum & epididy-
 midem, ramificationibus & divaricatio-
 nibus paucissimis, ut solent arteriae, re-

* Graaf. Tab. 6. fig. 1.

Etioribus lineis corporis viscera trajice-
 re: per hanc a corde calens sanguis ad
 testes fluit, ubi secreto sensim feminali
 latice venam ingreditur, quam itidem
 antiqui praeparantem dixere, ignota ut-
 pote adhuc sanguinis circulatione, sed
 minus proprie dixere; nihil n. praeparat:
 recipit solummodo cruorem redeuntem, e-
 umq; in cavam venam refundit, unde ad
 originem suam, cor scilicet, revertitur.
 Sunt autem hujus testicularis venae di-
 varicationes & uniones elegātes simul &
 admirabiles, * quemadmodum hīc aspi-
 citis, varias illas ramificationes secretas
 ab invicem & explicatas: ut omnino vi-
 deantur sanguineae guttae in prima illa
 pueruli conformatione in utero, quasi
 haesitasse in itinere, dum a testibus ver-
 sus corculum suum redibant, utpote suo
 spirituofo fluido tunc destitutae. Sed mit-
 tamus ista. Testium autem liquor defer-
 tur per deferentia dicta vasa, quae vide-
 tis, ad feminales hasce vesiculas, in qui-
 bus quasi promptuariis reservatur, vel
 involuntariae per somnum excretioni,
 quam nocturnam pollutionem dicunt, vel
 quod primo loco dici debuisset, con-
 gressui cum muliere. Meretur hīc A.

* Graaf. de Organ. tab. 1. fig 2. confide-

considerationem vestram imaginationis vis, quae in dormientibus longe fortior, quam in vigilantibus est. quocunque enim modo libidinosus quis obsecundet cogitationibus, cogitatio certe sola seminis effusionem non concitabit: per insomnia tamen id non raro continget: ubi nec diurna objecta interturbant animi motus, nec tenendo corpori erecto vires impenduntur, sed membra quiete soluta stragulis insuper incalescunt. Verum rem ipsam consideremus, hoc est, congressum utriusque conjugatorum prolis habendae causa. Si autem omnia naturae arcana hinc percipere voluerimus, necesse erit, ut non festinemus, sed pedem quasi figentes, attente circumspiciamus ad omnia, quae tum contingunt. Et primo quidem consideremus peculiarem, quae in utroque sexu praecedit, praeparationem: primo marem videamus libidine commotum & coitus appetentem; dum enim is uxoris amplexu flagrat, sanguis omnis exaestuatur, quod ex citatiore arteriarum pulsu deprehenditur, si vel abessent alia signa; sanguineus rubor in vultu, & in oculis laetitia, & ex corpore universo transpirans quasi fumus

mus quidam incalescentis concupiscentiae. Sed nec solum sanguis verum praecipue genitura in suis contenta vesiculis, quas ostendebamus, turgescit, non aliter ac si quaedam ibidem esset fermentatio, & praeterea intumescentiam quandam in sese circa perinaeum observare, eo momēto plurimos scio *, & quasi distensivum dolorem, qui remittit ubi cupidini satisfit. Eadem haec dicta fermentatio est, quae stimulat & concitat musculosas membranas testium & scroti, ut priores retrahantur, corrugetur vero posterius: nam de colis musculus res manifesta est. hi enim stringentes corpora, quas videtis cavernosa dicta, ita simul premunt venas, ut impetuose influens arteriosus sanguis, dum prompte non refluit, abundantia sua distendat praedicta corpora, & infarciat quasi, unde conciliatur membro firmitudo & constantia, major minorque. quod redditur evidenti-
 us in morbofo illo statu, quo muscoli hi corripiuntur spafmo five convulsione continua, ubi ita obrigescit & distenditur in omnem dimensionem penis, ut doleat inde graviter, nec ullo modo levetur: dixere** medici auctores Priapi-

*

** *Estmüll. Tom. 2. p. 1007.*

smum

smum: quoniam scortorum patronus apud gentiles tali membro a pictoribus & poëtis fingebatur. Rursus si muscoli hi reddantur paralytici, sequitur vel ex sola hac causa deficiens erectio, adeoque membra torpida tum reddantur & flaccida. Hæc fermētās genitura etiam lympham exprimit, ex prostratis quas videtis glandulis, quae lenta est & glutinosa, unde & urethra subsequentem genituram sic facilius transmittit: praeterea haec viscosa lymphæ immixta masculino semini impedit, quo minus ita facile evaporet: quemadmodum in officinis pharmaceuticis videmus, quod lento amygdalarum oleo, fugaces odores jasmini vel aurantiarum florum retineant & servant. In quibusdam autem viris hæc prostatarum lymphæ tam copiose adest, ut interdum promptissime effluat ad quoscunque animorum libidinosos motus, sive conjugem desideret maritus, sive amasia suo aspectu & aura quasi, amatorem adolescentem concitet. Et ista quidem hætenus in maribus. In foemineo autem sexu res alio modo sese habet, quod referendum itidem est. Licet enim in sanguine similis fere excitetur quasi

quasi fermentatio, sensibilis interdum, nec occulta adstantibus, membra tamen ipsa non indurescunt, sed leniuntur & remittunt quasi, aridaque ante & sicca, jam affluente humore mollescunt, glandulis quibusdam, Anatomicis nostris alias & distincte descriptis & delineatis in super, lympham fundentibus tenaciorem & glutinosam, unde viae redduntur ductiles, quasi pararet sese natura ad suas functiones peragendas. haec lympham in aliis etiam animalibus copiose fluere observatur: & in maturis viro mulieribus commovetur saepe ad cogitationes paulo lasciviores, fere eodem modo ac in homine esuriante ex appositis in mensa dapibus saliva moveri solet; sentiuntque mulieres sese ea quasi perfundi, ubi colloquuntur cum viris suis amantius, ut jam taceam amplexus ipsos & congressus, ubi interdum & mariti id animadvertunt. Sed in quibusdam corporibus sanitate minus firma gaudentibus, ita parce fluit haec lympham, ut inde non sine quadam difficultate viris cohabitent. Et comperui * conjugum quorundam super hac re querelas, adeo ut nuptiae huic non voluptati jam, sed torturae subtra-

here

here sese mallent, quam obsecundare
 suis viris. Ad quas sopiendas querimo-
 nias, hosque defectus naturae supplen-
 dos arte, viris vel commune oleum, vel
 unguenta medicata praescribi debent.
 Praeterea haec lymphā quam deficere
 diximus interdum, interdum & acris
 valde redditur, unde aliud malum ori-
 tur, quod ubi levius est, pruritus dicitur,
 ubi ingravescit, fit uterinus furor, five
 summus salacitatis gradus, & delirium
 libidinosum, nimiumque tunc desideri-
 um maniam infert, non tamen truculen-
 tam, sed blandam & mitiorem. Mihi qui-
 dem in praxi observare licuit * lymphā
 hanc fuisse in hoc morbo interdum tan-
 tae acrimoniae, ut instar vesicatorii em-
 plastri femora excoriaret & salsamento-
 rum referret nidores. haec autem dicta
 sufficiant de praecedente ad congressum
 apparatu in muliere. Proximum jam est
 & necessarium requisitum, ut genitura
 maris ab aëris secura injuriis immedia-
 te deferatur non in vaginae quendam
 angulum, adeoque irritō conatu & fru-
 straneo, sed in uteri interiora. in quem
 finem membrum a vaginae rugis dirigi-
 tur quasi, dum interim matricis liga-
 * menta

menta affixa pubis ossibus, abbreviatione sui trahentes internum orificium transversim positum, faciunt id descendere obvium virili urethrae, adeoque aperturis in hunc modum cruciatim sese tangentibus, ipsa quasi conspirare in suum opus viscera videtur. Exempla* tamen prostant foeminas concepisse ubi interior illa membrorum conjunctio non praecessit: & mihi etiam notus est civis honest⁹ huj⁹ urbis **, qui non nisi postquam peperit uxor ejus, recte cum illa congredi potuit. In hoc autem conflictu non mirum est seminales vesiculas, quas jam ostendebamus, arctari, adeoque exprimi contentum liquorem in urethram per exilem hanc carunculam. exceptus vero liquor tum motu peristaltico urethrae, tum actione muscutorum circumjacentium per reiteratos conatus propellitur & excernitur: numerantur hi muscoli quatuor, quos hinc praeparatos aspici-
cite: duos collaterales seu erectores, duos alios dilatantes seu deprimētes dictos, quos licet separatos ab invicem & discretos, tamen agere conjunctim in nobis experimur: adeoque retuli jam vobis A. nude & simpliciter omne illud quod prae-

* Riolan. *Anthrop.* l. 2. c. 35.

**

stare

stare ad impraegnationem masculus potest. Quid autem praecise & quomodo conferat nupta, non ita obvium vel facile determinatu est, quod vel ex ipsis in hac re sibi contradicentibus auctoribus patet: interim quid mihi & attento in hanc rem, & medico uxorato cognitum & exploratum sit, vobis, A.H. referam: quod dum facere nequeo, quin propalem plurima ex secretioribus mulierum & familiaribus sermonibus percepta mihi, haereo certe num id deceat publico hoc loco. nam concitarem forsan iram in me honestarum mulierum, & formosas laederem illa describendo, quae invitissimus quisque alteri ostendit. Tamen cum spectent quaestionem nostram propositam, & requirantur ad enodandum hoc mire contextum opus Conditoris, & praeterea faciant ad refellendos eorum sermones, qui negant* inesse mulierum corporibus genuinum semen, unde & inter veteres quidam foemineos testes frustra factos & spurios dixerunt, nec nisi rudimenta quaedam aberrantis naturae: Spero, A.H. mihi non vitio versum iri, si non certe inurbani joci, vel dementis risus captandi; sed utilis doctrinae

* *Aristoteles, Averroës, Avicenna,*

nae gratia ad illa me accingam; Equidem in disceptationibus difficilioribus non ita presse debemus inhaerere sententiis scriptorum celebrium, quin etiam attendamus interdum ad ea, quae hominum vulgo de re eadem videntur. Jam autem primum notari velim, quod communi quodam consensu credatur dari & reperiri in foemineo corpore, praeter illam cujus mentionem supra fecimus lympham, aliud quoddam semen: quamquam quid id praecise sit, haud ita facile est per anatomen detegere, ejusq; originem viasq; determinare: & constat certe inter conjugatos, uxorem aequae ac maritum per intervalla suum semen ut ita dicam fundere, quod licet mulier non eo modo & manifeste excernat extra sua viscera, quo mas, tamen sentire sese in sinu hunc seminis motum confitentes jam saepi⁹ mulieres audivi, * & praeterea foemina languescit aequae ac mas & defatigatur illa secretionem peracta: & genitalia viscera in utroq; sexu admodum tunc sensilia sunt. & dum fit, stringitur vagina & contrahitur, quod explorasse sese in semetipsis retulerunt mihi mulieres ingenuae, & in maribus itidem huic quid simile

simile efficere acceleratores musculos dictos nobis ipsi sumus conscii. Insuper mulieres aequae ac mares, ac cum voluptatis quodam sensu, pollutione dicta nocturna per insomnia vexantur. praeterea referunt interdum contingere, ut ista voluptuosa resolutio apud illas frustretur quasi, & subsistat in congressu, non sine quadam animi molestia, quando masculus ocius sese expediens absolvit suum, ut ita dicam pensum promptius & festinantius, nuptamque hac ratione quasi deserit: contrario etiam modo posse accidere, ut procedente lentius marito & segnius, illa interim bis vel ter interpositis tamen temporis momentis suum conferat, quod mihi persuaserim observari frequentius in meridionalium regionum mulierculis. Ubi vero praeterlubitum nupta & invita quasi cogitur ad amplexus a marito, ne semel quidem tunc experiri illas illum in sese intestinum motum, nec percipere voluptatem notam. Etiam audiivi saepi⁹ * matres quasdam asserentes sese sine ullo voluptatis sensu suos concepisse liberos: quae diversae circumstantiae in diversis induxerunt nostros scriptores, ut de existen-

tia foeminei seminis ambigerent, praecipue cum esset & id animadversum, quod aliquando cum utriusque sexus voluptate mutua & resolutione celebretur congressus, absque tamen impraegnatione insequente. Interim, hoc non obstante sunt quaedam matres, quae perfecte determinant illum quo concepere amplexum, ubi autem interrogantur de indiciis istius conceptus, respondent simpliciter sibi intra viscera peculiare quid contingere, quod exprimere verbis nequeunt, aliter quam in congressu tali extraordinarium quoddam & animi deliquio proximum in sinu gaudium perceperint. Mihi certe hinc in memoriam redeunt verba cl. viri doctoris medici & populosissimae Amstelodamensium urbis physici senioris Joh: RUISCHII in publica quadam praelectione prolata, aut „ nolle mulieres dicere, aut nescire ipsas „ quomodo illis dum ex maritis concipiunt contingat: Posterius crediderim, nullusque dubito, quin si possent honestae etiam matronae referrent amicis sincere quomodo sese ista haberent, nisi peculiare quid uti dixi in tali foecundo congressu, & ineffabile illis accideret, quod sentire

sentire possunt, eloqui non possunt. Genuinum itaque semen datum esse mulierum corporibus nunquam negavero, cum secerni tenacioris quid & viscidioris humoris eo ipso quo resolvuntur momento, quod & explorari, & ut ita dicam, promi quasi possit, mulieres ipsae fateantur, falsi sint & viri quidam: quod pro semine illarum habendum putarem; nam lymphæ, cujus supra mentionem fecimus, esse non potest, utpote quæ effluit in initio: quando autem artificiosa illa humani cadaveris infectio Anatomia præter ovula, sic dicta, in ovariiis nihil detegat, & viam, per quam probabiliter deferri ad uterum eadem possint, tubas scilicet Fallopianas, utique concludendum tandem est, hæc ovula proliferum illud foemineum semen constituere, quod excitata quocunque modo intrinseca commotione, seu libidinosæ, ut ita dicam, contremiscentia inferiorum viscerum, vel tum statim, vel paulo post ex ovario excluditur, & per has tubas ad uterum devolvitur, interdum & ulterius, transiensque orificium matricis in anterioribus sese partibus prodit, sive jam sit illud ovulum, vel ma-

turum sponteque sequens, vel immaturum & excussum quasi, sive integrum sive destructum, adeoque colliquamenti instar, disrupta scilicet ob teneritudinem membrana. Itaque ut de eo jam certi simus, tamen de vero exclusionis ovi momento, num actu ipso, num postea fiat, disceptant inter se Drelinecurtius & Graafius clari ambo medici *: Itaque ut superemus & hoc obstaculum, facile concipimus contingere posse, ut in salacioribus & quam supra descripsimus voluptatem ipso congressu percipientibus ovulum secretum cum interno quodam sensu per oviductum devolvatur & protrudatur versus matricem, ubi foecundatur admixtum geniturae maris. Quis enim evincet haec fieri nullo modo posse? Imo quidni fieri posset, ut hae fimbriae, quas hinc suis coloribus nitidissime delineatas aspicitis A. H. contrahantur circa ovaria? cum in maribus carneas scroti fibras corrugari, & tendinosam testium membranam hanc contrahi in hoc actu constet. Nam functiones partium ubi nos latent in uno sexu, tunc indagandae sunt

* *Graaf. dissert. de Org. Dreline. concept. de conceptu.*

sunt ex similitudine viscerum in altero sexu, de quorum usu manifesto & patente nullum dubium est. Et quemadmodum in nobis urethra per repentis quasi & reiteratas contractiones contentum liquorem profilire facit, ita & tenendum est ovulum excussum per cornua vel tubas versus matricem premi & pelli. Cumq; nullum tempus certum congressus praescriptum homini a natura sit ut reliquis animantibus, quoniam multiplicari humanum genus ad orbis terrarum culturam decebat, cumque in foemineis testibus* non aliter ac in racemo uvarum non omnes simul baccae perficiantur; ita contingere potest, ut affectu concitato immatura interdum ovula excutiantur, quemadmodum tempestas arborum immaturos fructus adeoque tenacius adhaerentes tamen dejicit conquassatione ramorum violentiore: & quemadmodum nuclei in talibus fructibus imperfecti simul & steriles

B 2

sunt,



*Muliebre semen: Kvinnans
saed eller froe: vel sic dicta
ovula e virginis teste vel ovario ut plurimum pisi
magnitudini respondentia. A. ova minuscula
B. majuscula* BIDL. tab. 57. fig. 1. 2.

sunt, nec germinant licet fertili terrae tradantur, ita & frustrari conceptionem necesse est in hac immaturitate geniturae foeminae. Et ut inhaereamus huic similitudini, quemadmodū A. H. maturi fructus gulam demulcent, acerbi & austeri fastidiuntur: ita probabile est amplexus institutos eo praecise tempore, quo contingit maturum quoddam ovulum adesse exclusionem quasi tentans e suis claustris, majore etiam gaudio parentes perfundere. Sed nec de eo videtur dubium esse, quin mater concipiat geminos & trigeminos, ubi matura ovula plura ad uterum devolvuntur; quin & oriatur superfatatio interdum, ubi utero jam praegnantis superaccedere maturum ovulum contingit, ibidemque foveri nec destrui. Et hisce quidem modis congressum conjugum ovi exclusio comitabitur, quod semper fieri debere Drelincurtius urget. Cum Graafius contra, sentiat, non nisi post aliquot dies transactos ovulum ad matricem delabi: quod mihi persuadeo in istis mulieribus fieri, quae sunt temperamenti frigidioris, uti loquimur, quaeque internum illum gaudii sensum non habent, dum

dum vacant huic negotio: in quo casu
 aura geniturae maris penetrare debet
 per ipsas tubas usque ad ovaria, ovu-
 lumque proximum maturescens infice-
 re, quod sic lentius procedens, non nisi
 spatio aliquot dierum interjecto ad ma-
 tricem perveniet. Utque rei minus a-
 moenae & tristi hoc ipsum comparem;
 eodem modo hîc natura procedit, ac vi-
 demus in quibusdam hominibus ex inge-
 sto multo & acri vino, vel per infortuni-
 um deglutito corrosivo veneno, vomitus
 prompte sequi, non praevio longo fasti-
 dio, cum rursus alios, qui ventriculi pitui-
 tosa intemperie laborant, non nisi post
 diuturniorem nauseam tandem vomere
 observemus. Haec itaq; hætenus suffi-
 cienter explicata nobis videntur. Sed
 ut nihil praetereatur quod facere ad
 certitudinem rei potest, occurram ob-
 jectionibus Lamii, medici Galli, qui hâc
 de ovulo hypothefin maxime impugna-
 vit vulgato libello: *Contre la nouvelle Opi-
 nion, qui pretend que tous les Animaux sont
 engendrees dun oeuf.* Ubi praecipue me-
 retur attentionem, quod refert de foe-
 mina, in cujus post mortem apertis vi-
 sceribus tubae Fallopianae ea fuit obser-

vata concrefcentia, ut ne quidem inflato aëri transitus daretur; altera tuba peritoneae accreverat ita, ut & illa absque dilaceratione ad ovarium adduci non posset, unde patebat & ovariorum & tubarum usum, quem urgemus, in illo corpore nullo modo obtineri potuisse: interim tamen illa ipsa mulier, & antea saepius, & eodem quo obierat mortem anno, puerum pepererat, adeoque & eundem conceperat, absque ullo, ut videtur D. Lamio, ovariorum vel tubarum auxilio. Percipitis A. H. argumenti vim: nos autem observata huic Viro in dubium non trahamus; id tamen adnotemus, quod potuit hoc vitium huic mulieri facile advenisse, postea quam suum conceperat foetum: nam in illo longo tempore, quo mulier uterum gerit, & in illa viscerum distensione, quid mirum, si quid superveniat incommodi? ex quo mutari cornua Fallopiana in istam praeternaturalem constitutionem potuerunt. Certe si in muliere hac etiam antequam reddita fuisset gravida, ita comparatum cum tubis ovarisque fuisset, quomodo obsecro potuisset praegnans matrix vel distendi debito modo vel

vel attolli in abdomen & ascendere, absque dilaceratione hujusce peritonaeo agglutinatae tubae? Hæc itaque objectio nos non ulterius detinebit. Sed praesentio, A. H. aliud quodam dubium hîc etiam a Vobis moveri contra ea, quae dicta a me sunt, scilicet minime patere, quomodo infantes referre patrum vultus possint, quemadmodum fieri ut plurimum videmus, si nempe masculo adscribamus quidem foecundationem ovuli foeminei, non autem ullam embryonis primam materiam; si denique & illud asserimus, quod embryon in ovulo etiam ante conceptionem existat, ut quibusdam medicis nostratibus videtur. Equidem, A. H. foetus illud primum rudimentum tantum abest ut genitoris imaginem referat, ut vix homini assimilari possit, capitis mole totum superante reliquum corpus, ut alia taceam, nec nisi temporis tandem longo tractu parentibus agnoscatur: cujus similitudinis adfuisse etiam ante quaedam occulta lineamenta non nego: sed vos, H. A. vicissim interrogo, * cur infantes interdû & aliis ex familiaribus & domesticis similes nascantur, cur pictae interdum imaginî

* Conf. *Helmont, van de Mens.*

magini aut statuae sculptae; curavorum
interdum vultus referant, & attavorum,
jam dudum demortuorum? Omnia,
haec, ut brevis sim, fortiori debentur
imaginationi matris. Cujus stupendis
viribus describendis si immorari jam
vellem, discederem, A. longius ab ar-
gumento proposito, five anatomica vi-
scerum & mechanica functionum descri-
ptione. Sed est & alia Neotericorum
excogitata opinio circa ovulum hoc, &
primum in eo stamen foetus. Nimirum
docent vermiculos five animalcula quae-
dam microscopio detegi in virili geni-
tura, quorum numerus licet innumerabi-
lis sit vel in unica liquoris guttula, si ocu-
latissimo LEEUWENHOEKIO credi-
mus *, tamen non requiri nisi unum vo-
lunt ad ovulū unum impraegnandū; de-
generare autē & abire vermiculos in va-
ria animalia, ** vel ex bombycis in pa-
pilionem metamorphosi constare, ut a-
lia infinita insectorū genera praeteream.
Quam hypothesein cum recentiores no-
stri e Belgio reduces medici hodie re-
ceptissimam referant, nos eandem, licet
novam

* *Epist. ad Soc. Angl.* ** *vid. Goedhart.*
& *Mouffet.*

novam & miram, non statim rejiciem⁹; sed potius quasdam probabiles rationes in medium adducamus, quae hanc sententiam credibiliorem vobis etiam, A. H. reddere possint. Quidni enim in difficili & philosophica quaestione, qualis utique haec est, aliorum etiam sententias & audire placide & circumspicte ponderare liceret? Observamus itaque naturam a minutissimis sua opera inchoare solere, saltem seminum primordia, ubique tenerrima sunt, jam autem hoc animalculum ovulo infinitis modis exilius, videtur illi recte includi debere, ut res mollior duriori, nobilior viliori. Praeterea cum quomodo peragatur ovi foecundatio ope geniturae maris, nondum explicari plane potuit, aliis mixturam seminum & immediatum contactum, aliis auram vel spiritum inficientem quasi quodam contagio, aliis admixtum totius massae sanguineae virile fermentum, & per omnia viscera oberrans, supponentibus; ex hac utique hypothese res jam redditur clara & perceptibilis. Videtur insuper exigere dignitas masculini sexus, ut praecipuum conferat ad procreationem sobolis, commisso matri munere,

munere, ut in sinu foveat nutriatq; quod recepit: eodem modo ac terrae mandantur quidem grana plantarum ut germinant, ipsa interim illa vegetativa vis in femine haeret, terrâ solummodo nutrimentum, subministrante; & objici quidem potest animalculum proximius suum alimentum ex utero ipso capere posse, quam ex ovo longius diffito: Verum AUD. H. similitudine quadam hanc etiâ diluam difficultatem & conficiam. Nonne enim videmus, quomodo ancillae & servi nostri, ubi excitandus & struendus ignis est in foco, scintillas ex chalybe excutiant, non in ligna dura & viridia adhuc, sed primo in mollissimum fomitem ex linteo combusto, vel re simili paratum, ubi haeret & restat scintilla, cujus aliâs non nisi momentanea duratio est, fomitemque depascens augetur, donec accendatur interim sulphuratum, dein candela, post aridiora lignorum segmenta tandemque ignis in stipitibus majoribus in flammam erumpat: certe eodem ingenio natura videtur hîc progredi. Nam exilissimum animalculum primum excipitur molli fœtu maturi ovuli, ubi sufficienter alitur,

tur, donec robore aucto per umbilicalia jam vasa nutritium succum in utero secretum excipere valeat, & sic porro. Sed ne sim vobis taedio hisce speculationibus, hanc rem mittamus, cumque universa haec hypothesis videatur indigere quadam digestionem ulteriore, aliis illam excolendam lubenter relinquamus: & ad eos nos sermone nostro convertamus, qui ex ovario vel teste foemineo dextro masculos prognasci, & ex sinistro foemellas putant: talia, A. H. commenta facile excogitantur, redarguuntur autem difficile, quis enim determinabit ex quo latere ovulum fuerit primo devolutum in matricem, si ne mater quidem ipsa id liquido asserere poterit: est tamen haec opinio falsitatis convicta ex observatione quadam haud ita diu facta a celebri medico & Lithotomo Amstelodamensi Cypriano*, ubi refertur de foemina cui foetus fuit exsectus e Fallopiana tuba, ita ut aegra pristinae sanitati restitueretur: quae postea denuo concepit peperitque gemellos, sed sexus diversi, quorum rudimenta vel ovula ex uno eodemque ovario provenire procul omnino dubio

* *typis vulgata Ao. 1700. Amstel. 8vo.*

dubio; nam alterum ex ovariis erat jam ante plane destructum. Sufficit autem indicasse auctorem, quem per otium qui volet perlegere poterit. Quomodo autem continget, AUD. H. quod foetus nascantur sexus diversi? an & hujus discrepantiæ prima rudimenta etiam in ovo nondum foecundato praeexistere dicamus? Mihi si probabilem reddere hujus rei causam licebit, proferam, quam a clariss. olim Professore Medico Lugduni Batavorum Theod. CRAA-NEN accepimus, quotquot eo tempore hujus & singularis ingenii & acerrimi judicii Senis eramus auditores & discipuli. Assimilabat autem ille foemineos testes, testibus masculinis, uterum, scroto, clitoridem coli; & docebat quomodo, si contingeret uterum extra corpus propelli, & subsequencia tum ovaria in hanc bursam quasi excipi, & carneam illam glandem, tentiginem dictam prolongari, foemina talis deberet reddi masculo per omnia simillima. Rursus inverso ordine demonstrabat, quomodo si masculo recederent testiculi intra abdomen, & subsequens scrotum cavitatem formaret intro-spectantem, & propendens

propendens penis abbreviaretur in sese, ut exilitatem anserini calami vix superaret; in viro tali omnia forent organa a muliebribus visceribus⁹ nihil abludētia: hisce addebat fieri facile posse in illa prima membrorum delineatione, & istis momentis ubi in tenerrimo embryone constituenda futura viscera sunt, ut invalescente tunc intestina fermentatione vel propellerentur organa & masculus embryo formaretur, vel ut eadem illa quam dicimus fermentatione existente casu aliquo debiliore, adeoque retentis intra visceribus, puellula maneret; For-
 san, A. H. hæc joci gratia proferri a me creditis, sed addere ego hisce jam dictis possum, quod multa sint quæ arguant tardio rem puellularum intra matris alvum maturitatem, tum quoad conformationem membrorum, tum quoad partum ipsum, imo foeminam toto postea curriculo vitæ debilioris ut plurimum esse & tenerioris naturæ præmaribus omnes facile agnoscimus. Ovulo vero maturo & ad generationem idoneo in matricem delato, claudere statim sese eandem quasi præscientia quadam ad exacte retinendum, quod receperat, ferunt,

ferunt: quod verum quidem est, sed ita tamen ut illa clausura ex mechanicis procedat causis. Transactis videlicet tribus vel quatuor post copulationem fecundam diebus & oborta quadam in ovulo intumescencia claudi osculum uteri sensim observatur. Nam osculum hoc sive amphidaeum cum antea oblongum esset & mucronatum seu acuminatum, jam distento fundo, ut retrahatur ille apex ad centrum suum necesse est, unde sensim angustari, tandemque occludi debet. Tertio itaque vel quarto die clausum esse uterum tactu explorare * obstetrix callida potest, de qua clausura cum sufficienter egerim in dissertatione hîc loci Anno 1697 impressa in nostratum gratiam titulo *Obstetricis Suecanae* libro I. cap. 6. ubi orificii uterini per totum gestationis tempus variatio & variationis causae describuntur, jam eadem prolixius repetere non erit necesse; praecipue cum libellum in manu quorundam vestrorum hîc etiam animadvertam. Id addam, quod ex hoc contactu liceat cognoscere non illa solum quae praegnationem partumque spectant,

* *conf. Cl. Daventrius art. obstetr. cap. 13. usque ad cap. 22.*

spectant, an mulier gravida sit nec ne,
 an tempus pariendi instet, an genuinis
 corripiatur doloribus, an facilis vel dif-
 ficilis sit futurus partus & similia unde
 quam sit obstetricantibus summe ne-
 cessaria fundamentalis tactus cognitio
 facile patet. Sed erit & ejus usus in aliis
 item casibus, exempli gratia; * Obser-
 vavi jam sæpius mulieres laborare quo-
 dam praeternaturali tumore abdominis,
 ita ut insolita quasi massa ad tactum
 interdum dura sentiatur, haesitentq; me-
 dici num vel mola sit, vel ovarii tumor,
 vel aliud induratum viscus, vel carnea
 excrescentia, itemque haesitent de ejus-
 dem genuino latibulo: tunc, si explora-
 tore digito talis orificii uterini formatura
 percipitur, qualis esse in gravidis de-
 bet utique intra matricem haerebit, ,
 quidquid illud tandem sit, sin aliter se-
 se osculum habet, alibi erit heterogene-
 um illud corpus quaerendum. Oris uteri
 varius certe habitus est, tum initio gra-
 vitationis, tum ingruente partu, ubi de-
 hiscit, recluditur & dilatatur: initio qui-
 dem durus & solidior quasi nodus senti-
 tur, qui postea urgente intus contenta
 mole, complanatur & mollescit quasi,
 sive attenuatur, tandem distenditur ad
 ambitum,

ambitum infantilis capitis, dum margo interim amplificati & complanati orificii tenuis est, instar cujusdam membranae. Non autem debetis, AUD. hanc uterinam apertionem ita vestris repraesentare animis, ac si fieret subito, ad similitudinem intestinalis cujusdã in grãdiore aliquo animali, sphincteris relaxati & sua contenta effluentis: Nam hic sensim omnia procedunt. Et quemadmodum solet natura in suis operibus majoris momenti lente festinare, ita & per gradus ad hanc dehiscenciam disponitur uterus, & totum gestationis tempus in illa orificii mutatione consumitur. Donec infans veluti maturus quidam fructus ex dehiscence suo involucro, e tenebris in lucem, e claustris in aërem liberum proferatur. Sed redeundum nobis ad ovulum est. Cujus in utero mutationes, & quomodo indies augescendo majorem perfectionem nanciscatur, quoq; ordine singulae partes perficiantur, id in Avibus, Cuniculis, aliisque animantibus cum cura observatum abunde tradiderunt Harvaeus*, Graafius**, Malpigi-
us***, & ocularis præterea inspectio, saltem in praedictis generibus facilitate obvia

* *Hist. Anim.* ** *de Organ.* *** *de ovo incubato.*

obvia haberi a studiosis potest: quaecum non aliter in principe omnium animalium homine procedant, possumus inde doceri, quam sint exilia, tenuia & fere abjecta omnium viventium initia; hoc autem loco, AUD. H. illa jam prolixius non recensentur: summa tamen & praecipua non negligemus, quae inter umbilicales arteriae merito & primo numerandae sunt. Hae postquam per varios gyros & tortuoso ductu processerunt, dividuntur in ramos, qui in divisiones ultiores & subdivisiones, tandemq; capillaria vasa abeunt; quae dum ubique impingunt in concavam superficiem uteri, reflectuntur, & involvunt plane ovulum, non aliter ac in urnis angustioribus nostri Hortulani observant arbuscularum exoticarum & fruticum radices mire intricatas & convolutas. Sanguis interim circulans per venarum exiles origines lente refluit in unum truncum, qui inde capacitatem arterias duas simul sumptas facile superat.* Sanguifera ista vasa una cum uracho tunica involuta vaginali funiculum constituunt umbilicalem, quem *Navelstraengen*

C

dicimus

* vide figuras Hobokenii de Secundina.

dicimus, complicatum locis variis, unde nodi in eo conspici, quos sollicite numerare solent obstetrices, credulisq; matribus ostendere, tanquam indices subsequentium liberorum. Hae itaq; ramificationes vasorum componunt substantiam illam sui generis, carneamq; molem foetum ejusq; tegumenta obvolventem, non aliter ac vitellum ambiri videmus & includi ab ovi albumine: haec est, quae postea uterinam placentam vel uterinum hepar constituit: *Den Mutter-Kuchen*, ut Germanis dicitur, Nostri simpliciter *Efterboerden* appellarunt, capitque intra breve tempus insigne incrementum, adeo ut superet anserini ovi magnitudinem, dum interim inclusus foetus muscam majorem vel cariophyllum Indicum vix aequet. Talis ovi descriptionem habet Ruischius in suis observationibus *, habet & PORTALIUS, egregius in arte obstetricia scriptor, in suarum observationum ultimâ, ubi delineatur figura referens secundinarum parenchyma per medium dissectum, plurimis scatens hydatidibus, in centro gerens, membranaceae cavitati inclusam aquam & embryonem tenerri-

* cap 15. Observ: l. 1

mum, Quem nos hîc cristallino vitro &
 balsamico liquori innatantem, vobis ex-
 hibemus AUD: distinctioribus membris
 omnibus instructus est uti videtis, adeo-
 que & praedictis paullo adultior. Dixi-
 mus autem umbilicalia vasa haberi me-
 rito debere pro primoformatis; id quo-
 modo fiat jam consideremus attentius
 in similitudine sequenti. Cum faba ex. gr
 mandatur terrae, & oboritur in eadem
 quaedam fermentatio, tum omnium
 primo radicis propellitur aculeus in
 circumfusam terram, & adigitur non
 aliter ac culex rostrum suum trudit in
 cutis poros, ut sanguine repleatur. Cum
 autem resistat terra ejus progressui, hae-
 sitat radícula, dum interim faba ipsa at-
 tollitur, interdum & supra superficiem
 terrae; eodem modo ac nauta procedit
 in cymba sua stans, quam conto a litto-
 re propellit, impressa in sabulum cuspi-
 de. Prima autem haec fabae germina-
 tio non tam debetur affluenti cuidam
 terrae succo, quam humido intra ipsam
 incluso, sicuti & maltum, sive hordeum
 germinans cerevisiae confectioni desti-
 natum, ex aspersa aqua absque terrae
 contactu præparari videmus. Dum

hoc modo occupatur natura in radice formanda, nullus fere conspicitur caulis, nec is prius erumpit, quam plantae haec quasi placentula confecta, novas vires & novum robur fabae conciliaverit. Ut autem constet quomodo & illa procedant, ponendum est dari quiddam in confinio radicis & trunci seu caulis, quod cordi animalium analogon est, & comparari potest, quatenus & recipit & pellit humores circulantes; succus enim germinis per radices non aliter ac quasdam umbilicales arterias delatus ad extremitates, sorbet accipitque novum terrae succum, indeque revertitur per canaliculos umbilicalibus venis non dissimiles, ad locum illum, quem cor referre dicebam; a cujus loci premente vi, novique succi e terra accessione & augetur denuo radix, & qui supra terram frondescent furculi propelluntur, transeuntibus per omnia folia fibris quibusdam, tanquam arteriis ad vehentibus necessarium nutrimentum, & aliis rursus tamquam venis revehentibus quae superflua sunt. Quae omnia facile sic sese habere vel ex eo perspiciemus, si cogitemus, quantus vel betulae vel viti succus

cus verno tempore infit, qui sine motu intrinseco & circulatione stagnaret brevi, situmque & acorem contrahens putresceret. Eodem autem modo res cum foetu procedit. Nam & animalia cuncta vegetativam quandam vim in se habent, hactenusq; plantis similes & nos sumus, quod non omnes aequae partes simul, sed hae quasi radices embryonis ante alias producantur; quod & observatur manifeste in abortivis ovis. Cum enim jam saepiuscule * aperuerim carneas istas moleculas abortu rejectas ante octavam septimanam vel decimam, inveni easdem referentes magnitudinem praeterpropter gallinacei ovi, e vasculorum tricis & acinorum globulis constantes, lienisque parenchymati similes, flava lympa in interiore cavo plenas, umbilicalis funiculi rudimentum quoddam mucilagineum referentes, embryonis vero nihil certi quidquam. Nec tamen dixerim hosce esse inanes conceptus, quos Gallico idiomate, *Faux Germes*, appellamus: & subventanea quasi ova, in genuinos foetus nunquam abitura: sed vel in molas, vel quos in Belgio vulgus mulierum, nescio unde, *Suy-*

gers nominare solent: Nam potius crediderim hanc partem exteriorē ovi, proximamque contactui matricis, & uti dixi, maxime necessariam ante omnia perfici, ut hospiti futuro nec dum visibili de nutrimento prospiciatur, ejusque teneritudini ex limpido quodam muco conflatae, hoc munimentum circumponatur, quod includendo cristallinam aquam, cui innatat carina foetus, totum hoc a viscerum matris compressione, praeservet: quā aliās laedi facile posset, sicuti vel alvi pertinacior obstructio non raro nocere gravidis solet, ut taceam alia. Arteriosus autem ille sanguis antequam per venas revertitur ad foetum, lambit subtilem materni cruoris chylum secretum per fibrosam & glandulosam substantiam uteri, illoque turgens ad hepar primo, post & reliqua viscera embryonis pergit, augeturque hoc modo tota ejus sanguinea massa: nec praeter hanc ullam habet cum matris sanguine foetus communionem, pressique * saepius placentarum recentium convexam partem, ut viderem num manaret sanguis, sed nihil animadverti praeter subtilem hunc quem dixi chylum: unde &

reddi ratio debet, cur sit venosus umbilicalis sanguis arterioso floridior. Et praeterea facile liquet, quam sit crassus cruor matris ineptus, nec satis subtilis, ut tenerrima stamina embryonis inde rite nutriri possint.* Dum in his venis arteriisque describendis occupor AUD. referam casum nuperum nobilis Puellae, qui mihi in memoriam redit;** nam attentiores vos ad similia video: erat autem valetudinaria, & in suburbanum praediolum recreandi animi gratia recesserat, cum subita paralyfi corripere-
tur, qua per vices alterutrum latus occupabatur cum aphonia & abalienatione mentis, convulsionibusque per intervalla diris; jamque in septimum diem durabat morbus, & consanguinei adornabant funebria, cum subito ad sese rediens circumstantes incipit alloqui, mente sana paullo post & corpore. Aegram saepius invisebam, cumque semel adstarem lecto, tentans pulsum digitis, sentio primum, post & animadverto oculis, venas ipsas pulsare arteriarum instar, easque micantes in dorso manus mecum adstantes mirabantur. Conjicio autem causam hujus vibrationis insolitae in su-

* *conf. Alb: M. & sequaces ejus.* ** peri-

perio rem alicubi venarum truncum in-
 teriore spasm o constrictum, unde libe-
 rior sanguinis refluxus ad cor impedi-
 batur, indeque regurgitans purpureus
 latex ad singulos arteriarum pulsus ve-
 nas jam attollebat & vibrabat. In hepa-
 tis vero portarum venis ramisque ea-
 rum talem undulationem semper fieri,
 plurimi asserunt. Videtur autem hic
 umbilicalis venosus sanguis praeter chy-
 lum, foetui in nutrimentum conceden-
 tem, aliud quiddam e matris visceribus
 itidem adferre vivificans & aëri a nobis
 inspirato analogum: quod vel probatur
 ab umbilicali funiculo in partu compres-
 so: ubi enim a vicinis visceribus & par-
 tibus solidis usque eo arctatur, ut con-
 tingere facile potest, eum vel praevis
 propendensque, aëris ex frigore obrige-
 scit, vel premitur a corporis quadam
 parte simul prodeunte, vel circumvol-
 vitur collo, brachiis, cruribus, vel alio
 latente modo & occulto impedimento
 sanguinis per eum motus sufflaminatur,
 idque antequam respirarit hauseritque,
 infans aërem per pulmones, praesentis-
 mum is periculum incurrit suffocatio-
 nis, fatisque cedit, latente circumstan-
 tibus

tibus causa, nisi prompto illi auxilio subveniatur: Idque jam animadverti* saepius in Agrippis seu infantibus pedibus praeviis prodeuntibus, praecipue cum haesitantes cunctantesque obstetrices non sine gravi peccato sensim lenteque prodire sic verum infantem permittūt. Idemque observare licet in illo difficili partu, ubi praevia umbilicalis vena prodit, conjuncta infantis capiti vel alio item corporis membro, unde & invaluit Germanicarum mulierum proverbium: *Die Schnur geboren, das Kind verloren*. In hoc casu pedes infantis investigandi sunt, matureque versus, sic extrahendus est, follerterq; prospiciendum est, ut quamprimum nascatur, alioquin nascetur quidem sed mortuus. Cujus rei tristes casus saepius stupens vidi, antequam mihi, succurrendi ratio sic laboranti infanti innotuisset. Est itaq; tanta necessitas circulantis per umbilicalem funiculum sanguinis, ut cum longas aliās in transitu moras nectat infans, capiteque haesitet vel ultra spatium triginta horarum, tamen tandem vivus edatur in lucem, praeter omnium spem, vel cum natus & respirans infans absque alimento vel per

per viginti quatuor horas duret. hujus tamen pressuram funiculi, antequam respiraverit, non nisi cum periculo vitae, vel brevissimo tempore ferat. Referam quod contigit hisce diebus * celebri inter nostrates obstetrici, *Johannae Hoffmannae*, ut cum facili partu exclusum sanum robustumque puerulum sinu excepisset, subito is ipse post aliquot suspiria moreretur. Inopinum casum latentemque causam mirata, postquam puerperam suo reposuisset lecto, attentius ad secundinas respexit, animadvertitque in funiculi fere medio nodum ita affabre, adstrictum, ac si fuisset manu compositus. Cum id retulisset mihi, hanc subito expirantis foetus causam dixi. Potest enim contingere, ut ipsa partus hora, convolutum interius circa orificium uteri hac ratione AUD. in spirae modum funiculum, transeat foetus vel capite, & tunc circa collum ejus convolutio ista haerens observabitur, vel humeris & corpore toto, in quo casu necesse est, stringi neq; intra uteri cavitatem relictum funiculum, & quo arctius procedente foetu colligitur ille nodus, eo praesentius ob vasa pressa periculum incur-

rit foetus. Ubi vero circulatio dicta sanguinis non sistitur, foetus utcunque plurima patiatur, vitalis tamen manebit. Quidnam autem praecise vivificans illud sit, quod a matre foetui communicatur, id aliis otio abundantibus discutendum relinquo; nam theoreticis disceptationibus detinere vos, AUD. H. hoc loco nolo. Certe ni foetus aëreas particulas a matre acciperet, nullas haberet; nam aquis submersus plane est, omni tempore illo, quo intra uterum degit: & notabilis est Senis HIPPOCRATIS de hac re sententia libro de octimestri partu: *umbilico, inquit, pueris spiritus & alimenti datur ingressus*. Sed sunt, uti dixi, cognitu quaedam Practicis magis necessaria. Placenta itaque eo loco primum utero agglutinatur, ubi umbilicales arteriae in ramos dividuntur, qui subsequenter mensibus gestationis majores quidem redduntur & capaciores, sed in novos ramulos ulterioresque crispaturas non abeunt. Nam postquam moles tota jam adaequaverit anserini ovi fere magnitudinem, ab omni quidem parte tunc utero illud ipsum amplectenti adhaeret: sed cum lymphâ, quae continetur

tinetur intus, crescat indies, necesse est, ut membrana eandem ambiens, magis magisque distendatur; nam sequax & ductilis est; vasorum vero & ramificationum congeries non augentur numero, nec fiunt plures: itaque ista moles segregatur ab invicem praecise in eo loco, ubi coeunt vasorum capillarium extremitates, quod quidem ab ipso funiculi trunco, adeoque placentae quasi centro, remotissimum est. Hoc itaque modo quod ante referebat globum, jam vere refert placentam quandam * in sartagine frixam, crassam, rotundamque modicam tamen. Generaturque in utero non aliter atque ex inflato vitri globo, pedem scyphi vitrei planum in officinis vitriariis formari videmus. Adeoque illa ipsa moles carnea, quae initio gravidationis uteri latera undique contingebat, subsequentibus mensibus partem solummodo internae cavitationis occupat, & quod reliquum est matricis parietum, id investitur a tenui membrana, quae lympham foetumque includit, cujus tenuitas firmatur ab uteri crassitie, quemadmodum in Nobilium vestimentis videmus, sericum panniculo pretioso subditum,

* *Dæventr. cap. 12. art. obstetr.*

firmitate

firmitate panniculi praemuniri, ut non facile scindatur. Et quoniam insuper ductilis est haec membrana, hinc facile distenditur, prout illa crescunt & augentur quae intus sunt, id autem placentae non accidit, uti jam diximus. Membranae itaque ex hoc globo, quem anserino affimilavimus ovo, detectio seu propullulatio fit non aliter ac videmus glandem quercinam ex calice seu cupula prominere & protuberare. Vel eodem modo sese habet ac si vesicam hanc bubulam vento vacuum, manuque comprehensam pugno includerem, postea vero tubo eandem inflarem, quid tum fieret? digiti quidem sejungerentur ab invicem ob turgescentem vesicam, sed maneret interim ipsa vola manus immota a vesicae eo latere, quod proxime attingebat. Si jam contingat, AUD. illam membranae propullulationem fieri prope fundum uteri, tunc necesse est, ut ipsa placenta, quam calici glandis affimilabamus, haereat in ea regione uteri, quae fundo obvertitur, hoc est, circa orificium, vel in ejus confinio. In quo casu magnum postea imminet matri etiam vitae periculum : quod quomodo accidat

accidat referam. Appropinquante scilicet partus tempore, uteri os sensim aperit, sese & dehiscit, uti jam ostendetur, adeoq; placenta huic affixa loco ut distrahatur tunc & dilaceretur necesse est: unde improvisa & infausta haemorrhagia continget, ita pertinax, ut intra breve spatium animam aegra cum cruore reddat, nisi artificiosa & dexterima manus opera deliberetur a foetu uterus. Et offendet tum obstetrix statim placentam obturantem & occludentem vel orificium uteri, vel ejus quandam partem, quem casum prolixius descripsimus libro II. capite 28. in *Obstetrice nostra Suecana*. Itaque non assentior iis, qui placentam semper habere suam in fundo uteri sedem fidenter asserunt: nam ubique adhaerere & omnibus ejus lateribus potest, quod & *Drelincurtius* tradit in suo quem nominavimus tractatu, & *Portalius* item refert in suis observationibus *: narratque se sua manu extremisque digitis placentam circa orificium haerentem illinc separasse & divulsisse. Sed & praeterea, si consideremus gemellos adesse posse, duplicemque

* *Obs.* 2. 39. 41. 51. 69. 79.

que, quod saepissime fit, placentam possidere; vel si supponamus superfoetationem contingere, ubi necessario secunda debet adesse placenta, utramque autem in fundo tunc haerere non possibile est. Nam una harum saltem erit ad latus locata. Dicebam, AUD. H. gemellos ut plurimum duplici placenta instrui. Interdum enim accidit, dum eorum umbilicalia vasa in principio in eandem feruntur & tendunt quasi plagam, ut confundantur simul & intricentur, unamque sic atque communem referant placentam primo intuitu; duplici tamen praeditam funiculo, uti facile percipitis; sed & praetera membranae ipsae intergerino pariete, ab invicem discrepantur: gemelli vero & si vel plures adessent, separatis includuntur membranis & aquis propriis innatant. Sed ut ulterius quaedam addam de situ placentae; Experientissima obstetrix & vulgato libello: *Der Brandenburgischen Hebamme* celebris JUSTINA SIGISMUNDI; in privatis ad me literis responsoriis circa quaedam illi proposita dubiola, asserit, cum millibus aliquot parientibus prae-buisset auxiliatrices manus, semper ta-

men

men, modo non haemorrhagia adfuerit, placentam reperisse sese in uteri fundo. Quam sententiam hujus egregiae foeminae medicae, ut cum antedictis conciliem, proferam, AUD. ostendamque, quomodo reperiatur placenta in uteri fundo, etiam eo casu quo fuerat re ipsa ejus sedes in alterutro uteri latere. Uterus in gravidis assimilari potest sacco ex aluta confecto. Est tamen crassior eo in loco, quo placenta adnascitur, & augetur illa ipsa crassities ex adglutinata placenta. Jam vero, foetu excluso, collabitur uterus & corrugatur: est autem in illo collapsu, latus uteri oppositum placentae tenuius adeoque aptius, uti apparet, formandis plicaturis, altero crassiore minus apto existente ad corrugationem, unde etiam obvolvi necessario debet orificio & obverri, hinc & manui obstetricantis necesse est ut occurrat & objiciatur: non aliter ac si esset in fundo. Idque simili fere modo ac si quis lateri hujus pilei adnecteret ferream lamellam, post autem conaretur, hunc in modum, totum comprimere, videtis quomodo necessario illa pars cui adhaeret lamella, tan-

dem convertetur & obvertetur pilei orificio. Sed ad alia AUD. HON. trans-eamus. Foetus in utero positura sic vulgo describitur, ut capite quidem prono sedeat, & intra genua inclinato, spectet tamen uteri fundum: hic vero diaphragma matris, dorso foetus respiciente dorsum matris, podice perinaeum. Intueamur autem in hoc muliebri sce-
leto, ossa quae pelvim dictam constituunt, in qua pelvi & uterum posuit natura, & per quam transeundum in partu infantibus est; Consideremus autem hoc sacrum os dictum, quomodo id retrorsum incurvetur, ita ut hujus pelvis superior pars, nempe ejus margo ad anteriora inclinatus, lineam diagonalem cum horizontali describat, matre stante erecta, inferior autem pars pelvis posteriora respiciat, ex quo sequitur uterum, dum supra pelvim ascendit, suo fundo non posse obverti diaphragmati matris; sed potius ad anteriora debeat & hypogastrium versus inclinare. Cui accedit, quod rotunda ligamenta uteri affigantur ossibus pubis; adeoque impedimento sint perpendiculari ascensui matricis. Foetus ita-

que, quamvis tangat uteri fundum vertice suo, respectu tamen corporis matris recta insistentis suis pedibus, capite omnino pronior est, quam vulgo creditur. Quod insuper experimur, dum acuminatum istum globum renitentem & durum, circa regionem umbilicalem saepe & infra umbilicum in praegnantibus mulieribus admota manu sentimus, adeoque dorsum infantis, matre stante, horizontalem fere obtinet posituram. Certe cum anno * praeterlapso in suburbano *Danawicensi* Nosocomio aperuimus gravidæ cadaver, vidimus circumstantes semestrem foetum plane talem in utero obtinentem situm, qualem nunc descripsimus. Nam defunctorum corporum apertiones in hisce ut & aliis medicorum disceptationibus practicis praecipuum lumen largiuntur. Itaque, ubi foetus ad illud tempus pervenit, quo organa ac partes solidae perficiuntur, tum incipit sese commovere, extenditq; modo pedem, modo brachium, moxque retrahit in pristinum situm: id medium gestationis tempus vulgo audit, foetumque tunc primum vitalem factum muliercularum sermo est. *at fo-*

stret kwicknar. Quoniam autem lymphâ distenduntur membranae & insuper glabrae sunt, & foetus in prono situ, & caput mole magnum & grave pondere est: utique non mirum, si sua sponte id petat inferiora, podice interim ob calcitrationem jugem sensim sursum elevato. adeoque in aquarum sufficiente copia, & alio nullo accedente impedimento, necesse est foetum contingere capite suo orificium uteri: id dicunt obstetrices foetum esse conversum ad partum: *ett wael waendt foster.* non dubitantes, quin si caput praevium ori uteri objaceat, facilis sit partus sequuturus; dumque explorant gravidas, sentiunt non obscure per intermediam substantiam uteri renitentem globum, scilicet praecipitatum foetus caput. Cujus inversionis non possum determinare certum tempus: plerumque quidem fit circa noni mensis initium. Interdum aliquot ante partum septimanis duabus, tribus, quatuor, vel quinque: interdum & paucis ante partum horis. Incipit autem ineunte nono mense matricis orificium tenue sensim fieri, eo modo quo id supra explicuimus, & usque eo dehiscere,

hiscere, ut tangi jam involucra foetus ab obstetrice possint: qua re animadversa instare partum & tempus enitendi praedicat: eumque ultra quindecim dies aut summum tres septimanas non procrastinari. Eadem haec uteri dehiscencia viam laxat aquis quibusdam, sensim in utero collectis, non tamen intra membranas foetus, nec in omnibus praegnātibus: guttatim destillant, sed & interdum affatim effundi illas observavi *, cum terrore & metu matris, tamen absque detrimento infantis; nam hujus genuinae aquae non nisi in partu effluunt, ruptis per dolores membranis. Partus quidem, AUD. H. jam describendus instat, sed licebitne vestra venia quaedam de gestationis termino interferere? Alia quidem animantia constitutum sibi a natura certum terminum habent: matribus nostris incertus est: Equa consumit annum in suo pullo ferendo; Vacca quadraginta septimanas, adeoque propius accedit ad humanum morem. Canes, felesq; uterum gerunt novem septimanis: Cuniculi triginta diebus, Gallinae Anatesq; suis incubant ovis septimanis tribus, ut taceam bruta alia: homo an-

ticipat

ticipat interdum, interdum retardat
 partus horam natalemque diem. Nam
 ut nihil jam dicam de septimestri partu
 vel octimestri, utpote immaturis: etiam
 in foetu maturo non ubique obtinent
 novem isti menses calendarii, five septi-
 manae quadraginta, quam recepimus
 vulgo pro termino fixo humanae gesta-
 tionis. Licuit, contigitque mihi obser-
 vare * quorundam infantum & conce-
 ptionis diem & nativitatis, quae si vo-
 bis, AUD. retulero, gratiam vestram in-
 iturum me spero. Exempli gratia: dies
 amplexus fuit vigesimus quartus dies
 Februarii, partus pueruli fuit vigesimus
 primus dies Novembris: sunt triginta
 octo septimanae cum diebus quatuor.
 item: mater facta septimo Januarii, na-
 tum suum peperit secundo Octobris:
 sunt septimanae triginta octo cum die-
 bus duobus. item: congressus foecun-
 dus fuit celebratus vigesimo octavo Fe-
 bruarii, masculus foetus est exclusus
 vigesimo octavo Novembris; exacte hic
 numerus implet triginta novem dies do-
 minicales. item: concepit uxor octavo
 Septembris, peperit filium tertio Junii,
 sunt septimanae triginta octo cum die-
 bus

bus duobus. item: virum se praeftitit, maritus decimo Januarii, puellam enixa est nupta trigesimo Octobris, uterum itaque gessit hebdomadas unam & quadraginta, diesque sex. item: maritus suo functus est officio die decimo tertio Januarii, mater peperit filiolum vigesimo secundo Octobris, est tempus quadraginta septimanarum & dierum duorum. Possum, AUD. referre plures observationes similes, de quarum certitudine, non dubito; sed haecce sufficiant, ad ostendendum & discrepantes esse terminos, & puellas ad partum paullo tardius maturescere, promptius autem puerulos. Nam priores transeunt quadraginta septimanas, posteriores non attingunt. Sed & hoc notandum, quod matres ipsae perceptibilius & evidentius certae sint de conceptione ubi masculos foetus, quam quidem ubi puellas utero gerunt: nam ita incertas tum observavi, ut haerint ipsae, num fuerint factae gravidae, vel non: adeoque de conceptionis die puellarum calculum quidem inire, possum ex probabilibus circumstantiis; sed de puerulis res firmior est. Praeterea & illud concludi hinc potest, quod

licet

licet aliqui referant, mulieres quasdam ad undecimum, vel usque ad duodecimum mensem gestasse suos foetus vivos legitimosque; id debeat tamen nobis esse suspectum, & inter rarissime contingentia numerari, si modo contigit unquam. Loquor de foetu vivo; nam de mortuos embryones restitare intra matris viscera diu posse, etiam ultra biennium observatum a Medicis est, & foeminam novi * incolam huj⁹ urbis, quae decimo octavo demum mense mortuum foetum enixa est: aliamq; **, quae per aliquot menses mortuum foetum in utero retinens, tandem eundem peperit, sed quod mirabamur, minime putridum. Rejecimus causam in eam, cui innatabat foetus, lympham, muriae instar, praeservantem contenta; sed & hoc rarius continget, ut plurimum enim cadaverosus concomitans foetor plenariam corruptionem abunde docet: Equidem communia illa impraegnationis signa valde incerta sunt: nam appetitus prostratus, & malacia, & vomitus; & turgescencia mammarum, & papillarum dolor, & mensium cessatio, & ipsa intumescencia ventris, non praegnantibus, imo &

imo & virginibus, contingere possunt, unde mulieres conceptionis incertae illiusque sciendi cupidae recurrunt ad explorationem illam, quam tactu obstetrices peragunt. Novi tamen matres, quae ab ultimo menstruae purificationis die, septimanas quadraginta & unam, cum diebus quinque, vel ut ipsae loquuntur, quater septuaginta cum additis duodecim diebus numerantes, non falli sese in suo calculo putant. Et memini a me observatum jam bis, nuptas hoc modo calculum ponentes, praecise quinto isto die, partus correptas doloribus peperisse insequente, sed puellas. Agamus jam de partu & ejus veram investigemus causam. Prima opinio est eorum, qui angustiam loci causam ejus esse putant: quod tamen experientiae non plane congruit; nam abdominis distensio in foeminis discrepat, etiam in una eademque muliere non aequae turget venter in una gravidatione, ac in altera, gracilior alias, alias distentior, & tamen idem tempus implet gestationis. Alii itaque auctores huic causae adjunxerunt calcitrationem infantis aperientis sic membranas quibus includitur. *Drelincurtius,*
quem

quem supra nominavi, causam partus inexpectatam proposuit, meconii abundantiam in intestinis foetus. Quod quidem meconium papaveris quendam succum proprie significat; hîc loci vero crassiora illa, picea & ex nigro virescentia contenta alvina intelliguntur, quae dum formabatur & per os nutriebatur in utero foetus, sensim genita sunt, auctaque tandem eo usque, ut ob intestina repleta anxius infans calcitret, adeoque haec prima sic partus causa existat. Idque ex eo probat idem auctor, quod in infantum statim a partu demortuorum cadaveribus dissectis reperierit intestina meconio hoc plena, omninoque distenta. Quae quidem cum ingenio & probabilitate dici lubens agnosco; tamen cum videam iisdem parturientium symptomatibus abortum expelli, quibus editur in lucem maturus infans, sive fuerit ille abortus semestris, vel septimestris, vel octimestris, ubi ista intestinorum distentio a meconio nondum tanta copia collecto, locum non habet: sive etiam fuerit ante partum demortuus nonimestris, ubi illa praetensa anxietas & calcitratio adesse nequeunt: utique inde concludi recte

recte potest, infantis calcitrationem, causam partus genuinam non esse. Est tamen haec plurimorum opinio, & *Hildanus* * Vir in chirurgicis exercitatissimus, & centuriis observationum scriptis clarus, refert de matre in partu demortua, ubi infans & transversim positus & funiculo umbilicali varie illigatus, uteri insuper corpus sinistro pede ruperat laceraveratque. & *Guillomeus* Medicus Gal-
lus ** observatum a se bis in dissectis cadaveribus tradit, eosq; nominat qui adfuerant, ubi foetus fuit repertus in abdominis cavo aquis & sanguini innatans matrice rupta: ad hasce objectiones, AUD. H. respondebo, ubi enarravero prius & plane descripsero, quomodo partus procedat. Omnem hinc difficultatem & totum hoc negotium similitudine quadam interpretabor, Nemo credo nostrum est, AUD. cui non semel saltem in vita vomere contigit, sive assumpto ad ventriculi tollendam intemperiem e Pharmacopolio medicamento, sive epoto in honorem & sanitatem amici e vinaria cella generosioris Bacchi poculo:

* Cent. 4. Obs. 57. it. Cent. 1. Obs. 67.

** des Accouchements lib. 2. cap. 13.

poculo: Equidem partus utcunq; peragatur cum periculo vitae nostrarum matrum, tamen si majora licet comparare cum minoribus, huic certe praeternaturali comotioni in plurimis convenire animadvertetur: dispiciamus circumstantias: primo percipit vomituriens nauseam quandam, five plenus ventriculus fuerit, five vacuus. Est autem illa nausea nihil aliud quam tremulus quidam motus in ipsis fibris ventriculi, quae fibrae carnaeae contrahuntur per intervalla & relaxantur rursus, tamen sine majore violentia: hinc interdum illud fastidium nauseosum diutius durat. Simile quid utero contingit: nam aliquot ante partum dies interdum, sensim sese contrahens id efficit, quod appellamus dolorem minacem, & dolorem inanem, de quo paullo post agamus prolixius. Dein observamus, quod ubi nausea jam in vomitum abit, angatur insigniter aeger, ut sudores etiam prorumpant. Observare id ipsum potuit, qui unquam adfuit parienti mulieri, quanta cum anxietate & corporis modo tremore modo sudatione aegra ipsa de loco in locum, de lecto in lectum sese transferat, praesentiatque

sentiatq; appropinquantem jam & brevi
 subsecuturum partum. Tandem veluti
 in vomitu ventriculus violenter sese per
 intervalla contrahit, & aegroto licet,
 reluctantante & invito expellit contenta,
 conspirantibus quidem in eum finem
 abdominis musculis, qui tamen ordina-
 rii vomitus effectores non sunt; nam il-
 lis solis compressione sua agentibus, &
 nulla praeexistente nausea nemo sibi fa-
 cile vomitum concitabit: ita & eodem-
 que modo obscurior ille & adhuc occul-
 tior fibrarum uteri motus, jam fit con-
 vulsivus, saepiusq; ingruens uterum in
 fundo contrahit ad contentorum expul-
 sionem, secundinarum scilicet foetum,
 in se aquasque continentium. Hi sunt
 genuini illi dolores, quorum ope uteri
 orificium perceptibiliter magis magisq;
 relaxatur & aperitur, membranaeque
 aquâ distētae vesicam bovinam urinari-
 am referentes propelluntur & extrudun-
 tur: idque matre plane invita, quemad-
 modum dicebamus de vomitu. Nam ad
 partum ita adiguntur interdum matres,
 rebus omnibus rite sese habentibus, in-
 fante uteroque bene sito & locato, ori-
 ficio satis ample aperto, tenui, molliq;
 ut

ut loco plane inidoneo, & tempore in-
 opportuno pariant. Quemadmodum ob-
 servatum fuit, quomodo aliquando in-
 fans ex alvo matris in terram praeceps
 ceciderit: item alibi notatum, quod
 parturiens cum latrinam petiisset, infan-
 tem ibidem subito excluferit. Haec au-
 tem uteri validior & potens contractio
 trahit in consensum robustos musculos
 abdominis: qui tamen primario partum
 non movent: nec praegnans solo illo-
 rum nisu foetum excludet: quamquam
 non negem, quin posset forsitan contin-
 gere, ut violento motu horum muscu-
 lorum, qualis esse in vociferationibus
 intentioribus solet, vel in illo nixu, qui
 obstructam valde alvum comitatur,
 injuriam sibi ipsi inferret mater, abor-
 tusque causa esset, sed non subsequenter
 nisi aliquot post dies. Neque mirum de-
 bet cuidam vestrum videri, si muscoli
 abdominis, qui sunt alias in nostro arbi-
 trio, invitis jam nobis, ab utero trahan-
 tur vel ventriculo in opem & consensum.
 Nam & idem quid accidit in longe le-
 viori commotione, sternutatione scilicet
 & tussi: cum tamen minus appareat
 communicatio inter inflatum naribus
 tabaci

tabaci pulverem, vel delapsam in bronchia micam panis & abdominis musculos, quam quae inter eosdem musculos est & uterum. Praeterea repetamus illud memoria, quomodo labia contremiscere soleant, & genae in instante jam vomitu. Observare autem & huic contremiscentiae simile quid licet obstetrici in exterioribus illis partibus genitalium mulieris viscerum, manuque sua praesentire adventantem dolorem potest, etiam prius quam puerpera ipsa: Et quemadmodum excitare possumus vomitum, immisso digito gulae, ita & obstetrices sollicitare uterum immisso itidem digito, & sic irritare partus dolores possunt: quod & interdum fit praeter illarum voluntatem, ubi scilicet invertendus in utero male versus foetus est, nam exacerbati & reiterati dolores non cessant nisi inde retracta manu. Adeoq; & hinc reddi causa debet, cur doloribus acerbissimis & vehementer deprimentibus afficiantur matres, haerente jam foetu, mole sui capitis in ipsis angustiis viarum: nam eo momento quam maxime uterum, ut gulam diximus intruso digito, irritari ad contractionem sui necesse est.

imo,

imo, ut rectius dicam, praesentissimum incurrunt ruptionis periculum distensissimae tunc fibrae. Insuper notemus ventriculo licet evacuato tamen non cessare statim vomitus, sed sequi violentos simul & inanes vomendi conatus, ut etiam inde usque ex intestinis expressa tandem bilis rejiciatur: sic & in puerpera dantur dolores post partum; *esterwaerkar* dicimus, qui conatus excluso jam foetu aliquamdiu durant. Hoc itaq; modo, AUD. H. vidimus comparisonem & convenientiam vomitus ventriculi cum laboribus matricis, parum discrepantem, nisi in eo, quod convulsiones ventriculi non sint eo usq; dolorifici, ac quidem uterini, nec contentorum tantae compressiones: posteaquam sic Creatori visum, ut & supplicium hoc cum primæva matre foeminae ferrent, & nos simul omnes, qui producimur, hoc & vitae, & quod magis est, male nascendi periculum subiremus. Uteri certe fibrae extra tonum quasi extensae & distractae proximae sunt ruptioni, id autem sine doloris vivo sensu fieri minime potest. Hinc communiter atroces & maximos ferunt dolores parturientes antequam aquae effluxerunt,

fluxerunt, post durant quidem dolores longius & persistunt & enitentes magis sunt, sed tamen minus esse eos excruciantes, ex matrum querimoniis & lamentationibus cessantibus colligitur. Collabente autem parumper utero & sublata aliquantisper illa praeternaturali ejus distensione immensa, fibrae motrices jam se contrahunt dolore quidem minore, sed conatu majore & vi. Quam autem sit longe vehementior matricis, quam quidem ventriculi, constrictio, docent abunde, quas supra attulimus, *Guillomei & Hildani* observationes, quibus ad rupturam usq; suae membranae circa durum acutumque os pedis infantilis contrahere sese uterum posse ostenditur. Sed & hanc uteri sese stringentis vim experiuntur obstetricantes, quando manum cum brachii anteriore parte intra reclusa jam viscera inferentes invertendi foetus causa, ubi id necessitas exigit, adeo usque comprimentem sentiunt invalescentibus doloribus, ut ligamento quodam ligari se putent, reddaturque brachium torpidum & stupens, & quamdiu durat illa uterina convulsio, nil quidquam agere possunt, imo retrahere interdum

terdum coguntur manum, quod illam
 pressuram nequeant perferre diutius.
 De diversitate dolorum, eorumq; variis
 nominibus quaedam hîc quasi interse-
 ram AUD. Nam ut reliqua fere omnia,
 quae huc usque recensita sunt, doctri-
 nae dicuntur gratia; ita haec sequentia
 obstetricibus observanda erunt, praeci-
 pue ut ne foeminas juvenes prima vice
 praegnantem, vel instantis partus metu
 terreant, vel, quod pejus est, exhibitis
 intempestive remediis partum praecipi-
 tent. Prima itaque species dolorum illa
 est, quae quasi praeludium quoddam
 esset, dici nostris uxoribus solet *smâ-knâp*
 & *ref*; tremulos uteri motus dices &
 minaces dolores. Gravidae iis solent
 per aliquot interdum septimanas vexa-
 ri, sed absque incommodo notabili, ob-
 ambulantes interim & peragentes sua
 domestica negotia. Ita tamen hi conatus
 sensim contrahunt uterum, ut in ultimis
 diebus gestationis sensibilibiter gracilescat
 abdomen & aliquantulum extenuetur.
 Quando autem invalescit haec contra-
 ctura uteri & intenditur, sequuntur do-
 lores dicti vagi, *ostadige werkar*, *smâ*
werkar, item dolores transversales, *kors-*
werkar

værkar, videnturque hi vagi dolores gravidæ per totum abdomen oberrare; & medicus minus peritus illos facile confunderet cum torminosa colica: uterum quidem totum occupant, sed non aequaliter ab omni parte simul, eodemque momento, uti similiter contingere in aliarum convulsionum initiis videmus, spiritibus influentibus modo in hos musculos, modo in alios. Neq; est uterus aequè sensibilis ab omni parte; unde fit, quod aegra videatur sibi sentire dolores circumvagos, iisque transversim quasi affligi. Dum autem hi dolores ab omni jam parte invadunt uterum, etiam ejus orificium constringunt, quod tamen doloribus remittentibus & visceribus relaxatis, ad pristinam redit conniventiam: hinc est, quod obstetricibus tum videatur matrix occludi potius, quam reserari: unde & hi dolores tergiversantes dicuntur, spuriiq; cum genuinis mixti; nostrates matronæ appellant *bedrægliga værkar*; suntque iidem, qui vulgo audiunt cruciantes, *svede-værkar*, quia matres incassum excruciant, & absque effectu optato, vires interim illarum consumentes, quod nocivum est, augmentq;
hanc

hanc noxam ineptae obstetrices, dum
 ubent parturientes, ut omnibus viribus
 connitantur: cum potius deberent miti-
 gari hi dolores vagi, quod advocatus
 tempestive Medicus exhibito narcotico
 efficiet, eo loco, quo empiricae mulier-
 culae pellentibus remediis concitant
 negras. Idem notat *DAVENTRIUS* in
 suo *Obstetricantium Lumine* dicto, egregio
 opere & diu desiderato ob famam sui au-
 ctoris in hac re longe experientissimi.
 Solent autem hi spurii dolores remitte-
 re interdum ad dies aliquot, imo & se-
 ptimanas, redeuntibus ad consuetas oc-
 cupationes culinarias & curas domus
 mulieribus. Id nostris dicitur *Wærkarna*
lä före. Ubi vero hi dolores insistant,
 necesse est, ut secundinarum illa vesica
 arctetur quantum fieri potest, tandem
 & extra orificium adigatur, quod ob fa-
 tam ante aperturam minime huic ex-
 iusioni obstare jam potest. Contractiva
 haec vis & facultas motricium fibrarum
 ugetur tunc & duplicatur in fundo u-
 eri, ex quo sequitur ulterior orificii
 eclusio, quod dum fieri nequit sine
 quadam violentia, sentiuntur dolores
 tamquam ad vicina inguina descen-

dere, illaque dilacerare. Unde & vocantur lancinantes dolores, *under ât eller neder ât skiutande værkar*, acerbi & vehementer deprimentes dolores, qua dolorum seu laborum specie urgente, incipit jam puerperium: suntque hi ipsi qui totum negotium absolvunt, eoque respectu dolores veri nominantur, & genuini, & urgentes: *rætta sanna ock sanskyldiga kast- kost- eller krystværkar*. Et ante partum hae quidem laborum species observantur attendentibus. Post partum vero dolores, qui invadunt, excluso jam modo nato infante, cum vacuus collabitur uterus & contrahitur, occluditurque & corrugatur, nostratibus *efterværkar* dicuntur. Hae autem jam recensitae & enumeratae species non semper AUD. & ubique adsunt, sed adsunt plures paucioresque, quo mater ipsa parit vel facilius, vel difficilius. Contingit autem interdum, ut hi partus dolores seu convulsiones uteri communicentur in morbofo valde statu totum nervolo generi, idq; in primiparis frequentius, utpote nondum assuetis puerperio; adeo ut quoties invadunt partus dolores, corpus jam universum exagitetur.

etur convulsionibus, quos dolores ca-
 put petentes dicunt: *Wærkerna stå i bus-*
fundet, eller stiga åt busfundet. In quo tristi
 casu nisi quamprimum contingat ma-
 trem a foetu liberari, vel nisu suo, vel dex-
 eritate obstetricis, (modo detur aditus)
 certe conclamatum est: quemadmodum
 hic loci haud ita pridem contigit.* Uxor
 ivis sartoris viginti annorum primipa-
 ra, transacto termino gravidationis, be-
 neque valens, media nocte subito cor-
 ipitur partus doloribus, mox abeunti-
 us in convulsiones diras, cum oris spu-
 na, abolitione loquelaе & omnium fere
 sensuum, advocabar, praescribo selecta
 remedia, remittebant quidem parum-
 per convulsiones, non tamen ita, ut ad
 e rediret aegra: hora sexta matutina
 incepit esse in agone: visum fuit e re,
 ut accerferetur *H: Dahmius* Danavicen-
 sis Nosocomii tum temporis Chirurgus,
 ut si matrem mori contingeret, aperire-
 tur venter defunctae, servandi foetus
 gratia, cujus motum consanguinei &
 circumstantes omnes percipiebamus:
 hora octava defunctam jam matrem esse
 omnibus constabat: aperitur abdomen
 & uterus in latere dextro tribus trans-

versis digitis a linea alba, foetusque festinanter exemptus traditur obstetrici ut ante focum refocillaretur, si fieri posset sed frustranei fuere conat⁹, nam erat modo mortu⁹. Perscrutabar interim ego hac occasione accuratius viscera defunctae, & adnotabam quae sequuntur: Uterus suo loco inclinabat versus hypochondrium dextrum, referebatque magnitudinem ingentis vesicae urinariae bovinæ inflatae, eratque figura talis ac expressit, quem supra nominavimus, *DA-VENTRIUS* in Capite de *utero praegnantium*. Vulnerato cultello utero exfiliebant aquae ad altitudinem ulnae fere, eratque illa omnis trium librarum medicarum, colore ex flavo virescente, qualis esse aqua solet cui lactucae incoquantur & similes herbae culinares. Ipsa matricis substantia, quo loco adhaerebat placenta, crassa erat duos digitos transversos, in reliquis locis dimidio digito tenuior. Videbaturq; nobis ejus substantia esse quaedam textura ex infinitis sanguiferis vasis & glandulis exilibus: foetus suo vertice orificium uteri, dorso hypogastrium matris albamq; lineam, podice vero, ejus umbilicum: ita ut stan-

te matre erecta, foetus in dorsum fere projectus esset, adeoque ad partum bene conversus. Placenta adnata erat uteri non fundo, sed sinistro lateri, ejusque inferior margo connexa erat in orificii confinio, superior fundum attingebat. Eademq; placenta ab utero adeo separabatur facile, ac quis linteum duplicatum madidum ab invicem sejungeret. Fallopianae tubae quartam ulnae partem longitudine aequabant, & crassitie pennam cygneam: venarum uteri maxima capacitas erat, quae vel digitum minimum admitteret. Testes foeminei sive ovaria nonnihil majora ac in non gravidis: hisce sic perspectis viscera consuebantur, repositumque decenter cadaver est, quae hîc omnia retuli prolixius, ut quae superius de placentae situ & similibus tradidi, confirmarem. Illa itaque quae aquis foetuque distenta haeret in matrice vesica, ad singulos dolores infarcitur, magis magisque orificio, quod eo ipso recludit, panditque sic viam infanti subsequenti, & ubi contingit parumper remitti dolores, tum sentitur haec vesica flaccida & mollis; ita ut proxima foetus membra tactu discerni possint,

sint, cum vero uterus rursus in fundo
 se contrahit ad ulteriorem expressionem,
 propendensque vesica ita distenditur, ut
 jam jam videatur ruptura. Non aliter ac
 videtis AUD. hanc bovinam urinariam
 vesicam, non plene inflatam collo sur-
 sum verso, jam a me superius stringi
 manibus, ita ut in fundo inde distenda-
 tur; remittente vero pressione mea, quae
 ante inferius turgida erat vesica, jam
 flaccida fit & minus renitens. Urgenti-
 bus autem pertinaciter doloribus, pro-
 pellitur quidem ductilis & sequax mem-
 brana aliquo usq; Cum vero integra, eo
 quidem modo ac gallina ova sua parit,
 pertransire angustam dictae vaginae vi-
 am nequeat, necesse est ut tandem rum-
 patur & diffiliat, quod promptius fit ubi
 tenuis membrana est, ubi v. firmior est
 partus certe reddi inde difficilis potest,
 manu autem obstetricis tunc divellitur,
 quo ipso aperitur aquis via, cum impe-
 tu effluentibus, quibus sic effusis, ute-
 roque sese arcte contrahente circa foe-
 tum, non aliter contingere potest, quam
 ut permaneat infans in quo tum depre-
 henditur situ, qui si pravus fuerit, sola
 obstetricis callida manu immutabitur.

Commota

Commota vero matrix, non contenta
 sui oneris partem abjecisse, pergit in
 conatu suo, non aliter ac si decretoria
 pugna, ubi aut vincendum aut occum-
 bendum illi esset, cum adversario decer-
 taret, & elapsis quidem aquis in armi-
 stitium quoddam consentit non in pa-
 cem, sensimque se denuo stringens ut
 immorantem inhaerentemque projiciat,
 summa ope nititur: quod interdum fit
 facili negotio: aquis & vias glabras red-
 dentibus & infantem simul proluentib⁹.
 Quo autem foetus pertransire possit an-
 gustum hoc ostium capite suo amplo &
 crasso, comprimitur id ipsum caput &
 arctatur, dum parietalia, quae hîc in in-
 fantili sceleto videtis cranii ossa fron-
 tale & occipitale sibi invicem cedunt,
 utpote circa futuras membranosa, ita ut
 uno subeunte, superponatur alterum:
 unde fit quod capillosa cutis complicata
 referat molem quandam carneam, ob-
 stetricesque supersticiosas decipiat, dum
 sibi persuadent, monstrosum quoddam
 infantis caput, excrescentia carnea de-
 turpatum ante portas esse. Verum edito
 jam in lucem puerulo, cerebrum, quod
 jugiter commovetur, repellit ossa mol-
 liuscula

liuscula in priorem situm, evanescitque omnis metus, & si vel esset caput infantis formae paululum oblongioris, tamen & illud contrectando sensim refingitur. Divina certe providentia fieri, agnoscendum est, AUD., ut infantilis vertex mollior existat & membranofus: nam alioquin si ex uno continuo offe-
cranium tum constaret, quî fieri posset ut infans unquam capite præfertim præditus paullo majore nasceretur. Nam quod ossa pubis maternae dehiscant in partu, uti sibi persuadent quidam, id ego nunquam observare potui, neque apparet, quomodo ossa haecce matris durissima, quae consolidata dudum ob-
rignere, uti videtis in hoc sceleto, cedere possint infantilis capitis mollibus tabulatis, & ita insuper mobilibus, ut complicari & coarctari quasi possint. Id interim nemo non animadvertit quomodo debeat exclusio capitis causa esse atrocis cruciatus & doloris summi, in primiparis inprimis: ubi enim caput infantis eo usque pervenit, ut jam incipiat distendere externam oram genitalium viscerum, aegra saepiuscule conqueritur & exclamat se laniari ungui-
bus

bus obstetricis: cum illa interim quieta sedens & exspectans nil quidquam agat, & ne quidem extremo digito contingat parturientem. Nimirum isto momento, cum ejulatu & vociferatione primiparae fit ruptura sive dilaceratio naviculae dictae; *le déchirement de la Fourchette* *: quod quidem interdum adeo perceptibiliter accidit, ac si panni quaedam lacinia digitis lente disrumperetur. Hinc Germanis dicitur *wan zum ersten die Mutter bricht* ; quasi vi perfringeretur. ** Est autem haec pars, duplicata quaedam pellicula cum interposita foveola transversim sita in perinaei suprema parte inter exitus & aperturas genitalium viscerum & recti intestini. Cujus adeo disruptionis vestigium cum obliterari nullo tempore queat, inter certissima signa ponendum est foeminam peperisse. De qua re quam necesse sit ut constet interdum, vel ex hac narratione patebit: Contigit in hac urbe ante aliquod tempus A. H. ut e rure ancilla captiva adduceretur sistenda supremo Dicafterio Regio, confitebatur de se ipsa

adigique

* *vid. Mauriceau.* ** *Exod. 13:2. אב פתר. PateriLap. Peuterer Teut. Petarder Gall.*

adigiq; se conscientiae stimulis ut id faceret, simulabat,* quod scil: a conservo juvene compressa illegitimum peperisset infantem, natumque trucidasset, adjuta ad id, uti dicebat,, a matre & sorore, concubini, inque eo sermone constans, ut sibi mori liceret postulabat. Negabant mater & soror sese conscias tanti sceleris fuisse, imo negabant eam unquam peperisse. Jussit Judex ut inspiceretur corpus reae, cui negotio cum duobus Chirurgis & primaria urbis Obstetrice & ego intereram. Sublata in mensam muliere, abdomen integrum, sulcis rugisque plane destitutum deprehensum fuit, dein lustrantibus inferiora nymphas quidem cum quatuor sororibus defloratas, sed hanc, quam dixi naviculam, nondum naufragium fecisse, animadvertimus. Retulimus itaq; Judici ream nunquam peperisse: quo testimonio turbata illa, confessa tandem est, sese commentam omnia, quae dixerat, percitam odio ita implacabili, ut fuisset parata ad subeundam mortem, modo caperet ultionem a mulierculis, quae obstiterant, quo minus eam in uxorem duceret juvenis, quocum consueverat.

Hoc itaq; modo detectus tunc dolus est: cum verum infanticidium fuisset expiandum effuso trium horum mortalium sanguine, ultore gladio. Sed illuc regredior unde diverteram. Contingit, AUD. idque non raro, ut umbilicalis funiculus circa collum infantis convolvatur, qui, ubi revolvi facile potest, periculum non infert: per circumvolutiones vero plures abbreviato funiculo, descendens infantis impeditur ulterior progressus: capiteque & collo excluso, cum nec replicari jam & revolvi funiculus queat ob brevitatem, nec obstetrix statim pervideant, quâ commode via revolvatur funis, tunc haesisse illis aquam, & quo se verterent in istis angustiis nescivisse eas, interdum observavi. Interim versatur infans in praesentissimo periculo suffocationis: nam ejus pectore & abdomine, a matris visceribus, quibus adhuc inhaeret, omni vi contenta enitentibus, compressis, respirare nequit, & sanguinis per funiculum motus intercipitur, a pressione dorsi & humerorum contra materna pubis ossa, quibus jam interponitur. Quaeritur itaq; quid consilii in tali casu, Dico nihil impedire,

pedire, quin liceat obstetrici funiculum intrepide incidere: ita tamen ut ex adstantibus una sic teneat eundem ambabus manibus, ut intermedio loco refectur, eoque peracto retineat tamen uti coeperat utramque extremitatem manu utraq; idq; firmiter: donec obstetrix infante extracto justam injecerit funiculo ligaturam, alias arteriosus infantis sanguis ante rite confectam ligaturam, per vasa jam patula perderetur. Alteram autem partem resecti funiculi umbilicalis, quae matris viscera spectat, in eum finem retineat, ut non retrahatur in uterum, & ut obstetrix eo quasi ductore ad placentam penetrare manu sua possit, si esset id necesse. Vel ipsa obstetrix sine adjumento alterius funiculum longiori filo liget, eundemque abscindat infra ligaturam, extremitate illa quae versus infantem est compressa inter digitos; donec peracto partu, umbilicum debita munire ligatura possit. Abscindi autem funiculos posse sine periculo, nos docent nostrae rurales obstetrices, quae in hoc casu jam recensito non cunctanter id facere solent: nam accelerato partu respirans jam aërem & novam exordiens quasi

quasi vitam infans funiculo non indiget.
 Natum jam vero foetum A.H. mortuum
 vel vivum placenta dicta sequitur cum
 membranis, sub uno communi secundi-
 narum nomine, uti notum est. Aqua-
 rum autem membrana non uno eodem-
 que in loco rumpitur: sed ubi tenuissi-
 ma est, vel ubi major illi vis infertur ;
 hinc quando contingit eam in alterutro
 latere diffindi, foetumque huic fissurae
 non occurrere capite suo, necesse est ut
 secum portionem quandam auferat isti-
 us membranae, & nascatur galeatus. In
 quo casu multam prosperitatem desi-
 gnari infanti in hac vita credulis matri-
 bus assidentes mulierculae facile per-
 suadent. Ego omnia evenire prospera,
 DEum colentibus credo, adversa vero
 spernentibus ; & ut expedit parentes
 spem bonam habere de liberis procrea-
 tis, ita terrere alios quasi infelicitern-
 atos, quod non tecto, sed nudo vertice
 in hanc lucem primum venerint, mini-
 me decet. Praeterca autem contingere,
 licet id rarius fiat, potest, ut foetu exi-
 stente tenello, & aqua pauca, tota haec-
 ce una cum contentis vesica integraque
 expellatur, ubi eximi e membranis in-
 cisis

cifis foetum necesse est. Sed non haec illa sectio caesarea est, de qua num detur, disceptare inter se auctores nostri solent. Nobis autem alia hîc sese offert ventilandam quaestio, quae mulierculas contradicentes in duas quasi partes dividit exercetque. Utrum nempe corpus puerperae statim ab excluso foetu circumdari cingulo debeat, nec ne? Est autem hoc cingulum nihil aliud quam domesticum mantile contortum leviter, quo stringitur arcte satis puerpera circum hypochondria: rationem hanc adferunt, matricem evacuatam sic suo loco posse detineri quietam: quae vero tali cingulo non esse opus contendunt, suam itidem crepant experientiam. Observamus certe puerperas interdum, foetu jam excluso, salvashacten⁹ & integras, subito tamen extingui absque ulla mortis manifesta causa. Observamus itidem ligatas puerperas cingulo tali, de quo loquimur, si laxari easdem contingat, incurrere in periculum suffocationis, cingulo denuo constricto redire ad sese rursum. Hinc nos judicamus hanc ligaturam esse pernecessariam, non tam ob eam causam, quam urgent foeminae,

ut uterus sic retineatur immobilis: sed ob negotium respirationis, quod cum reciproca diaphragmatis agitatione peragatur & musculorum abdominis, fieri facile potest, ut distendente hactenus foetu una cum secundis excreto, collabantur illi subito, flaccidiq; redditi amittant suum tonum: nec compellant viscera versus diaphragma, unde & illud quasi convulsum manet, interrumpiturq; sic respiratio, hoc est suffocatur aegra. Simile quid huic in asthmate convulsivo dicto contingit, quod eo certius describere possum, cum ipse in me fuerim hunc morbum expertus: extra paroxysmum, attollitur & deprimitur abdomen placide respirante aegro. In paroxysmo vero abdomen interquiescit: soloque pectoris motu tum peragitur respiratio, quae cum non satis faciat sanguineae massae, oritur tum illa inquietudo asthmaticorum & anxietas. Praeterea referam hîc quod mihi familiariter retulit Chirurghi inter nostrates experientissimi uxor, * mulier Belgica, se nimirum cum est puerpera, quod illi non raro contingit, angî solere inter dormiendum cum gemitu, quasi jaceret in agone, sed obser-

vante tale quiddam muliere custode, statim cingulum relaxatum esse conjecturare, idque celeriter tum constringere, & sic efficere ut ad sese redeat aegra: idem & aliis observatum scio. Est itaque hujus obligationis hic usus praecipuus fructusque: non obstante huic regulae generali, quod interdum sed rarius una mulier occurrat vel altera, quae ferre talem constrictionem nequeat. Uti * foeminam in hac urbe nobilem novi, cui praeterquam quod sine suffocationis periculo nullas in puerperio vel hysterica passione ejusmodi ligaturas vel cingula ferat, sed plane soluta valeat melius: insuper in medicaminibus, quae praescribuntur a Medicis, non admittat solummodo fortia odorifera, sed & expetat ambram moschumque, qualia tamen averfari aliae mulieres solent: Nos interim ex iis, quae fiunt communiter, artis regulas formamus. Ostenfum itaque tandem est, AUD. H. & per longas ambages demonstratum, quomodo e maternis claustris prodeat non ulla sua ope, sed protrudatur plane nixu & labore parturientis, in hanc auram lucemque infans. Cui tamen adsertioni meae videor mihi audire

dire voces contrarias eorum, qui mortuos foetus multo difficilius excludi quam vivos, urgent; & præterea *HARVÆI* observationem miram * de muliere mortua filium pariente, plane thesin hanc nostram evertere concludunt. De quibus singulatim dicam. Si foetus, inquit, nihil adferret & adlaboraret ipse ad suum exitum ex alvo materna, quifueret ut mater, labore longe majore, eventu multo magis periculoso & ambiguo, foetum vita functum pariat quam viventem? Respondeo: istius difficilis partus causam esse vel inconvenientem situm infantis, vel viarum insuperabilem angustiam, unde utrumque sequitur & difficultas partus & infantis interitus, & mors itidem non raro matris. Sic itaque distinguendum cum opponentium gratia hîc est: obitus infantis non auget labores matris, nam recte si conversus fuerit, eum æque facile ac vivum enititur: quod observatum a me in praxi, idque jam sæpius, affirmare possum. Cum vero foetus ante partum demortuus devolvatur, ut ita dicam, lapidis instar de uno latere in alterum, utique non facile contingere potest, ut ad

exitum rite convertatur: qui vero in ipso jam partu perit infans, vel perit, propterea, quod utero oblique, hoc est, prorsum, retrorsum, dextrorsum, sinistrorsum sito, difficilis partus reddatur, vel quod infans ipse in utero licet recte locato tamen non bene versus sit, sed pravam obtineat posituram, * vel quod pelvis nimis angusta & parva respectu habito ad reliquum corpus sit, qualis ut plurimum, sed tamen non semper, in pusillis foeminis observatur, adeoque ob transitus angustiam caput foetus usque adeo & excessive comprimatur, & quod videre interdum mihi licuit, ita in longitudinem crassioris cujusdam farciminis instar extenuetur, ut destructa cerebri oeconomia fatis cedat infans. Mirum itaq; hoc modo nulli videbitur, si a mortuo foetu ut plurimum liberetur difficilius mater, quam quidem a vivente. *HARVÆI* vero Cl. Viri observatio, quae Londini Anglorum contigit, sic ab Auctore ** refertur: *Mulier quaedam apud nos, compertum narro, sub vesperam mortua in conclavi sola relicta est. Mane autem sequenti inter femora ejus repertus est infans, qui proprio nisu exitum sibi procuraverat.*

verat. Ultima verba ex suo addidit Au-
 ctor, nam disputamus jam de eo: facti hi-
 storia in dubium a me non trahitur. Cum
 & ego a Medicis mihi notis observatum
 partum talem sciam, & quibusdam e
 vobis AUD. saltem e rumore publico
 non ignotus erit, qui in hac urbe ante
 annum contigit casus*, cum Paupercu-
 la mulier gemellis gravida post partum
 prioris mortua, alterum interim subse-
 quente die eniteretur. Nec dubito quin
 aestivis temporibus tale quid contingat
 saepius, quamquam non observetur ab
 consanguineis & amicis, utpote festi-
 nantibus in includenda loculo demor-
 tua, calida illa tempestate in hisce re-
 gionibus aequae ac alibi minus commo-
 da existente ad servandos diutius in do-
 mibus defunctos. *HARVÆI* autem præ-
 nominatus foetus absq; dubio mortuus
 fuit, aut saltem matri mortuae non po-
 tuit diu superstes esse: ad partum item
 fuit rite conversus, propulsus autem
 & exclusus ab ipsis vaporibus & aquis
 putridis fermentantibus abdominis &
 contentorum viscerum. Quemadmodum
 & domestica observatione non raro a-
 nimadvertere licet fermentantem recen-

tem cerevisiam fundum ipsius dolii, quo continetur, excutere: vel quemadmodum in tractatione aegrotantium videmus, hydropicorum aquas subito intumescere, interdum & post mortem expelli. Maneat itaque certum exploratumque, quod matri omnia debeat foetus, ejusque sola ope, & ex causis mechanice agentibus, excludatur. Quo tamen referendum etiam est, cum per manuariam operationem perficitur partus, & vi ac quadam necessaria crudelitate, in eo casu infelici, ubi infans sive vivus sive mortuus, matris servandae gratia, tanquam mortuus, ut inquit ille, tractandus est, cum nulla alia pateat via. * Verum, AUD. haecce tristitia omittere forsitan praestat in hac oratione mea, & quemadmodum peritos Poëtas in suis Scenis facere videmus, subtrahere quae amoena minime sunt oculis spectantium. Unum tamen non reticeam, quod huc maxime facit, & super quo anxii inter se Medici disceptare valde solent, nimirum de certo & pathognomico signo foetus jam intra matris viscera expirantis. Quando enim, ut me explicem. infantile caput exempli gratia a laboribus

* Vid. Daventr.

laboribus coactum, ita in vaginam descendit, ut axillas ad ossa pelvim constituentia adhaerere contingat, & expediri jam nullo modo possint, sed pereundum sit matri una cum suo foetu, nisi extrahatur is instrumentis: id quidem peragendum tunc est, cum in mora periculum sit, intumescantibus continuo partibus & evanescentibus sensim viribus afflictissimae matri: Deniq; & foetu ipso putrilagine sua tandem accendente viscera illa, quibus adhuc sicuti illaesus ita & innoxius inhabitaverat. Verum in eo difficultas haeret, quod incipiant jam inter se disceptare circumstantes, cum adhibendae manus laboranti matri sunt: numne infans mortuus sit, vel etiam num forsán vivat? Unde autem obsecro de eo certus eris? an signum tibi sumes a commotione foetus? certe immobilis est, compressissimis a continuis matris doloribus, omnibus ejus membris: an a pulsu arteriarum ejus? nullas híc tangere licet, parva enim pars est infantilis verticis quae tactui patet: an a putredine cadaverosi foetus? illa autem non nisi postea supervenit, nec adest initio. Nam cum epidermis a

cute

cute foetus ita separatur facile ac pyro-
 cocto corium detrahitur, est quidem
 tunc vere mortuus, sed & id esse potuit
 per dies duos vel tres. An itaque in
 matre ipsa investigabis hujus rei signa,
 qualia quidem plurima recensentur in
 scriptis nostrorum Auctorum: sed inni-
 tuntur illa omnia tetrīs dictis vaporibus
 foetus jam plane corrupti. Eo autem us-
 que procrastinata operatio & supervaca-
 nea est aegrotanti & spectantium calu-
 mniis medicum exponit, cujus sic opera
 facilius quam alia mercede persolvitur.
 Certe cum per literas etiam de hac re
 agerem cum Brandeburgensi illa, quam
 nominavi superius, obstetrice, quasdam
 quidem suas conjecturas, sed positive,
 nihil reposuit. Referam itaque signum
 quoddam animadversum tandem a me,
 quod vos, qui artem amatis obstetrici-
 am salutarem certe mortalibus, non vili-
 pendetis scio. Est autem id certi cujus-
 dam humoris, viscosae consistentiae, co-
 loris subviridis, nauseosi foetoris & lo-
 cis muliebribus effluxus, quo apparen-
 te mortuum jam foetum esse docemur,
 nec tunc ulterius impediendum (ut fa-
 ctum interdum scio) auxilium, quod la-
 boranti

boranti puerperae manuaria operatio
promittit. Experientissima inter nostra-
tes, & ob praestitam primum Lunebur-
gi, post & in hac metropolitana urbe, in-
de retro ab anno 1682, familiis illustri-
bus fidelem frequentemq; operam clara
obstetrix, CATHARINA WENTIN,
nuper fatis functa 63 aetatis anno, cum
qua ego ad laborantes puerperas & invi-
fere solebam lubenter, & disceptabam
saepiuscule, sed amice, & non nisi de iis,
quae ad artem spectant; dicere autem
illa in hoc casu solebat: *Modren tar på
flyta*. Eo significare volens parturientem
jam incipere versari in periculo pereun-
di una cum suo incluso foetu. Ego vero
non dubito, quin ex relaxatis faucibus,
& intestinis morientis jam infantis, hic
profluat & exprimatur succus, (sicuti
huic quid simile in adultis animam ef-
flantibus contingere solet) qui succus
ab admixto meconio plus minus tin-
ctus, linteo quod adhibere obstetrices
solent, maculam imprimit, talis, uti
dixi, coloris. Contigit hîc loci AUD.
in nobili puerpera, * ut posteaquam
hoc observassem signum, & petiissem
ut eximere mihi liceret foetum,
servandae

servandae matris causa, cunctatione circumstantium & contradicentium res differretur ad plures horas; cumq; tandem aperirem cranium foetui, cadaveroso omnia foetore implebantur, materq; animam reddidit paullo postea quam fuerat finita operatio. Advocabar & nuperrime ad puerperam laborantem; viso itidem hoc signo statim instituisssem operationem; sed cum essent robustae adhuc matris vires, cunctabar per quatuor horas, ne linguis laederer adstantium: exsumtum tandem cerebrum infantile foetore suo nares omnium feriebat, mater vero jam alterum in Charontis cymba pedem habens, extracta sic orci faucibus, convaluit, vigetque valetque. ** Sed his missis revertamur AUD. Benevoli & Honoratissimi, ad infantem, quem exclusum jam partu, unaque cum suis secundinis editum superius reliquimus. Consideremus autem quid illi contingere in eo statu possit? respiraret ille sine dubio ambientem licet insolitum aërem: sanguis autem placentae coalesceret paulatim, idemque fieret per totam longitudinem funiculi, unde putrescens pars quinto vel sexto die separaretur, sponteque

teque decideret prope abdomen, & quidem eo praecise loco, ubi viva illa caro & sensilis conjungitur cum insensili: umbilicalis enim funiculus omni sensu caret indolensque est: apparet & itidem circulus ille notabili colore & substantia insignis, pollicis circiter latitudine ab ipso abdomine remotus. Qui quidem circulus propius postea ad abdomen accedit, crescente sensibilibus nato primis istis diebus, ut abscondi videatur funiculus & intra abdomen delapsus separari. Quoniam autem putrescens placenta suo frigido madore & foetore insuper natum laederet, hinc nos non expectamus spontaneam decidentiam, sed filo quadruplici cerato trium transversorum digitorum ab abdomine distantia, hunc in modum funiculum ligamus, & relicto duorum digitorum supra ligaturam spatio detruncamus forfice, & una cum secundinis tradimus igni. Haec autem ligatura non est causa decidentiae & separationis umbilici, ut vulgo putant: unde & sollicitae mulieres jubent, ut ne relicta inter ventrem pueruli & ligaturam funiculi longitudo sit curta nimis; quasi quidquam decederet inde in adul-

ta postmodum aetate, & detraheretur, masculino ejus robori. Nam quocunque tandem in loco ligetur funiculus, tamen non separatur nisi in praedicto, unde & in delapsis & arescentibus funiculis, filum, quo colligebatur, medio conspicitur loco: separatio interim fit ibi, ubi vena & arteria intra corpus infantile divaricantur. Hic videtis AUD. truncum, quem exsiccatum in Museo asservo, concavum in sua extremitate, arteriasque observatis in hac inferiore latere, quod versus hypogastrium fuit, in opposito vero latere vena est. Supra ligaturam, placentam versus, vasa tria apparent, arteriae duae & vena una: id autem sic contingit: Venosus ex placenta redux sanguis venam supra ligaturam guttis solum sanguineis notat: is autem qui fluit infra ligaturam, defluit ad cor infantis, suumque canalem prope ligaturam relinquit vacuum, unde & ejus vestigium evanescit: arteriosus interim e corde infantis adfluens sanguis, continuis ictibus injectam ligaturam pulsat & quasi quandam remoram oppugnat: sed distendit solum propria vasa, & tandem coagulatur, hinc arterias infra ligaturam con-

conspicuas cernitis, mereturq; admirationem, quod arteriae vivaciter pulsantes, tamen intra quatuor vel quinque dierum spatium, adeoque brevi tempore, consolidentur & occludantur. Posteaquam itaque formatus umbilicus est, & funiculus jam decidit, obligari locus debet spleniis & fasciis umbilicalibus, per septimanas sex circiter, donec obducatur cicatrix & occallescat: ne forte clamore & ejulatu pueruli exomphalos excreseat, hoc est, umbilicalis hernia. In quo casu solent matres excandescences invehere in obstetricum imperitiam & incuriam, quasi injecissent ligaturam funiculo remote nimis ab abdomine: sed faciunt id immerito. Nam ista prominentia oritur potius neglectu mulieris nutricis, quae umbilicales fascias, *Nafvelbanden*, ut loquimur, praemature omittit: unde umbilico protuberandi conceditur occasio. Referebam AUD. nostrates hinc mulieres solere secundinas igne cremare: quem morem num laudare debeam valde dubito: nam & infantili sanguine turgidae, & conspurcatae cruore materno, possunt forsitan per sympathiae quandam vim, dum comburuntur, utrique

matri

matri natoque tormina excitare; quibus etiam in primis illis diebus communiter vexantur: itaque illa ipsa sepeliri praestaret & in terra abscondi, quod in aliis regni oppidis observari etiam percepi. Sed restat, AUD. H. praecipuus nodus, qui tandem, utcunque eum diffimulemus, enodandus tamen est. Nempe qui fiat, quod praegnans haecenus sana, bene valens, incolumis, ex improvviso corripitur doloribus partus, mitioribus primo quidem, post acrioribus, atrocissimis tandem, qui arte nulla nec remediis tolli possunt vel compefci, sed pertinaciter durant, donec vel pariat aegra, vel oneri succumbens moriatur: vel, ut brevius dicam: quidnam sit id quod irritet ac sollicitet uterum parientis ad robustas & violentas illas contractiones, & quaenam tandem prima & vera sit causa partus? Nam distensionem illam nimiam uteri rejecimus, quae diversa est in diversis, cum partus causa una esse debeat & communis. Rem conabor, ut feci saepiuscule, similitudine explanare: Nemo nostrum est, AUD. H. qui maturos arborum fructus, poma pyraque, in hortis non viderit decidere. Cur autem

tem cadunt? quia matura sunt, recte quisquis es respondes: nam maturitate illa solvuntur. Pyrum exempli causa, suo ramo firmiter adhaeret, donec mature-
 scat plane, caditq; in terram, ut putrescente ibidem externa carne maturi interiores nuclei suis sese claustris extricent, qui a vento & pluvia utcunque terrae im-
 mixti denuo germinare incipiunt; manifeste nobis hac ratione propagationis speciei implantatae inanimatis etiam re-
 bus ideam repraesentantes. Inhaereamus autem ulterius huic considerationi, & notemus quomodo dum pyrum crescit, vel fructus quis alius, nam res eodem
 redit, convenienti cum arbore, adeoq; & amica fruatur confermentatione, & uno agitetur aethere & spiritu. Sed postquam jam maturuit, aliud quiddam spirat, & nova tunc oritur & a priori diversa fermentatio. Quod erat antea vi-
 ride jam fit flavum, quod antea erat au-
 sterum jam fit dulce, quod erat durum fit molle, qui albicabant nuclei nigri fi-
 unt, ipse ille omnia ambiens aër inde, novo odore fragrat, & insolito impletur halitu. Haec autem superveniens fer-
 mentatio nova, AUD. nil aliud est, quam
 ad

ad imminuentem & subsecuturam corruptionem, hoc est, ad mortem, cui omnia crescunt & parantur, quaedam praedispositio; adeoque intermedius status vigentis fructus & computrescentis. Hortulanum admonens, non amplius indigere nutrimento alieno nucleos; sed aptos jam redditos, qui Marte proprio subeant germinationem novam. Interim haec in fructu fermentatio insolita nec conveniens illo motui intestino succorum, qui feruntur per fibras arboris, adeoque & hostilis & morbosa quasi, dum occurrit nutritio liquori in petiolo fructus, resistit ejus affluxui, qui stagnat inde in extremitate ramuli, acescitque & erodere ac incidere incipit tubulos fibrasque pedunculi fructus, qui inde, ut & ex denegato affluxu necessarii alias nutrimenti marcescit & fit aridus: hinc facile contingit, ut firmiter antea adhaerens pyrum ventorumque impetui obsistens, jam sponte cadat vel agitatione ramorum modica. Si quis AUD. H. velit oculis attentius aspicere hoc pedamentum pyri, animadvertet quendam quasi orbiculum circa extremitatem qua arbori adhaeserat: certe

pla-

placentulam quandam refert. Nam, si quis in horto vellet ita fulcire arboris quendam ramum, ut pondere suo pyrum cadere non posset, observabit hanc dictam placentulam sensim a suo trunco tamen separari. Observabit & alia quae huc trahi possunt : quomodo scilicet, fructus laedantur injuria aëris & frigore, vel insectorum aculeis vulnerentur, vel quomodo procellosis ventis illis vis inferatur, unde nova inducitur pyro fermentatio & enecatur quasi, ut cadat etiā immaturum. Idem & in aliis fructibus considerare juvat pruno videlicet vel juglande nuce ; cujus caro dum adhuc adhæret arbori finditur, ut exitus concedatur maturo nucleo, qui in telluris gremio aliam postea orditur vitam, dum nuces quae restitabant in ramis computrescunt. Applicemus haec omnia parturienti matri, & incipiamus a foetu ipso tanquam nucleo. Ejus posteaquam perfecta membra sunt, & organa nutritionis ac universae oeconomiae reliquae fungi incipiunt suo officio partim, partim apta & instructa satis sunt ut fungantur, adeoque viscera omnia uti recentiores quidam auctores medici lo-

qui amant, sua adipiscuntur insita fer-
 menta: tunc necesse est, ut inde oria-
 tur nova quaedam & alia, a priori qua-
 si-fermentatio. Qui intestinus humo-
 rum omnium motus communicatur iti-
 dem placentae, unde & ejus nutritio suc-
 co, affluentia a matre quaedam lenis tur-
 batio accidit, & inde in minimis fibris
 tubulosis stagnatio, usque ut acres hinc
 redditum humores incidant stamina pla-
 centae, illaque sensim incipiat ex eo se-
 parari ab utero, cui antea firmiter ad-
 haerebat: fere ac in sphacelo emortua
 caro fecernitur a viva: & praeterea hi
 humores acres, uterum tandem ipsum,
 non aliter ac assumptum emeticum re-
 medium, vel ingestum acre vinum ven-
 triculum solet, stimulant ad suas con-
 tractiones. Foetus itaque maturitas &
 inde nata placentae incipiens putrescen-
 tia, vera nobis est partus causa prima.
 Placentam certe in mulierum praegnan-
 tium cadaveribus, interdum, hoc est
 in immaturo foetu, difficilius paulo ab
 utero abstrahi, interdum facillimè se-
 qui eam dum trahitur observavi dudum
 saepiusque. Adeoque partum secundi-
 na statim sequeretur, nisi a rugis & pli-
 cis

cis collabentis & compressae matricis impediretur in eo. Observavi tamen & nuperrime* secundinam sponte sua ex matris alvo in terram prolabentem, dum erat obstetrix occupata in deligando funiculo recens nati. Et si qui erunt, AUD. H. qui secundinam utero adglutinatam firmitus a sese inventam dicant, non tamen id per omnem ejus substantiam observatum fuisse, sed in ejus solummodo quadam parte certus sum. Imo ubi procrastinatur partus, secundinas subsequentes notavi foetidas plane & fere putrefactas, eo praecipue loco, quo ab utero primum separari inceperunt: animadverti & ipsum umbilicalem funiculum corruptum ut mirarer infantem rebus sic positis sanitate frui potuisse. Et praeterea foetus aequae ac diximus de pruno vel pyro, immaturus interdum dejicitur, scilicet per abortum. Cujus omnes causae novae & inimicae, hoc est aliam & diversam a priore humorum fibrarumque agitationem introducunt tenello corpori foetus, ejusque secundinis. Sic moestitia & terror & excandescencia sanguinem maternum turbant & succum postea qui

foetui debetur: & matris in terram inopinus prolapsus & alta vociferatio, & ob astrictam alvum compressiones, terrissima foetus vasa rumpunt, eumque adeo enecant. Ut taceam occultiora, obstacula & singularem in quibusdam dispositionem uteri abortus frequenter sine manifesta causa, producentem: ut & praeteream quas alias abortus causas longa serie auctores medici enumerant. Rursus quemadmodum decerpti fructus & temperato loco servati sponte maturescunt, ita & praematureo partu editi septimestres & octimestres infantes possunt esse vitales & superstites, modo organa dicata nutritioni se rite habeant; & studiose servantur a matribus & nutricibus. Ut adeo cum antiquis quibusdam auctoribus omnes partus octimestres ad mortem condemnare non necesse sit. Haec itaque haecenus de vera partus causa & arborei fructus cum humano foetu similitudine dicenda habui. Partus autem exantlato labore restat adhuc puerperae locchiorum fluxus, qui nutritii illius succi in uterinis vasis stagnantis stillatio quaedam est. Hae aquae quoniam sunt corruptae, facile

facile concitant symptomata gravissima, ubi obstruuntur, haesitantque diutius. Nam suo vapore putrido inficiunt, hoc est turbant sangvinem & febrem inducunt & deliria & anxietates, & quae sunt reliqua mala, studiose praevenienda, ab advocato tempestive medico, ne aegram intra breve tempus conficiant. Esse autem morborum, quae puerperis accidunt praecipuam causam, corruptelam horum humorum, testari obstetrices possunt, qui ejus acredinem pustulas saepe in manibus earum excitantem sentiunt; & odorem percipiunt nauseosum valde, fere qualis esse foetor solet putrescentium in scorbuticis dentium, imo aucto malo intolerabiliorum. Uterus interim adfluentem adhuc nutrimum succum non consumit, nec depascitur, collapsis jam glandulis & poris quibus recipiebatur; unde redundans hic liquor in sangvineae primum massa, post & in serosis vasis circumfertur per totum corpus, donec in mammariis glandulis poros inveniat parum abludentes ab uterinis. Sensimque incipit ibi colligi, & misceri lactici harum glandularum, hactenus quidem

dem otiosarum, nunc sensibilibiter inturgescientium. Primus itaque liquor ille mixtus qui emulgetur colostrum dicitur, paulo post purum lac fluit paratum a Conditore & conveniens nutrimentum recens nato pusioni. Quomodo autem illa omnia perficiantur, rursus similitudine innotescet, desumpta ab arboribus quibus detruncantur insigniores rami, dum interim abundans interior succus alio idoneoque trunci loco denovo frondere & virgulta tenera proferre incipit. Hinc etiam patet quomodo subitanea lactis redundantia in mammis uterum ferentium, signum evidens esse possit foetus in agone constituti, vel jam defuncti, ut observatum a medicis practicis jamdudum litterisque consignatum a probatis auctoribus est. Quemadmodum autem, AUD. H. ut in similitudine coepta pergam ulterius, simulque finiam tandem hanc dissertationem meam, longiorem forsan quam Vos volueritis, vel ego praevideram; quemadmodum, inquam, videmus nucleos & semina plantarum germinare quidem, ubi fertili terrae committuntur, non vero statim ferre fructus, sed primo surgit

git tenue folium pedibus facile prote-
rendum, postea fit furculus; fit arbor,
non nisi post annos aliquot optatos tan-
dem datura fructus: Nonne autem
AUD. H. eodem modo comparata est
hominis generatio? foecundatum ovu-
lum & germinans in utero tenerrimus
fit embryo. Editur in lucem debilis in-
fans, manibus repens pedibusque instar
quadrupedis; erigit se, fit delectabilis pu-
sio, quique jam tum sentire incipit ci-
nere sub doloso occultos amoris ignicu-
los vel puer, vel puella. Florida succe-
dit adolescentia voluptates urgens, vo-
luptatibus obnoxia. Juveni lanugo pro-
rumpit circa mentum, juvenculae mam-
mae fororiantur; & purpurea signa in-
matura viro virgine, & ardens in vi-
ro cupiditas, ad res agendas serio, lu-
bricos jam ante stimulant, praecipitant,
cogunt. Non simplex amor, vagaque
libido & momentaneum conjugium, ut
quidam dixit, satisfacit, prolem appeten-
tibus, non amplexus: stabili itaque jun-
cti matrimonio, optatos diu desidera-
tosque ferunt tandem fructus. Dumque
suam in liberis redeuntem quasi & re-
nascentem imaginem mirantur paren-

tes, non mirum est, si omnes alios ex illorum animis amores, sobolis tandem charitas deleat quasi. Hos itaque vere diligunt, suspiciunt, curant, colunt: sui que immemores, ut liberis bene sit, ut floreat, ut parentibus maneat superstites coelum votis fatigant: Et si vel mori eos contingeret, sobolis non tamen intermoritur amor. Mater oblita * fastidiorum nonimestris gestationis, oblita dolorum partus, oblita periculi vitæ, laeta lubensque connubialem repetit lectum, novoque se parat rursus puerperio. Maritus elata mortua conjuge, subtristis filensque novas meditatur sub pulla veste nuptias: repetitque jugum, quod illi excussum fuerat. Meritoque hinc dicitur animal sociabile; sicut & omnium prima merito habetur conjugalis societas. Denique universum genus viventium ita natura instituit, ut prolis amor omnia vincat, & quotidie videmus bruta quidem animantia pro suis foetibus vitam & negligere & profunderere, homines etiam non

* Conf. Andr. Laurentium Lib. 8. Anat. Cap. 1. 2. 7. & Hofman. Comment. in Gal. L. 14. de us. part. c. 9.

non raro illa ipsa, quae vitâ deberent
esse cariora. Adeoque hâc non scripta,
sed nata lege, quam ex natura ipsa arri-
puimus & hausimus, rem agentes po-
steritatis, conservamus in perpetuum.
mirum illud opus DEI humanum ge-
nus. Vobis autem, AUD. HON. pro
auscultatione sedula & attenta maximas
jam gratias agimus: minime solliciti de
eorum censura, qui cum turpia facere,
saepe soleant, & facta sollerter occultent,
naturalia tamen verbis describi doctri-
nae gratia & loco & tempore debito vix
ferunt, imo quasi indignantur. Ego
laedere nullius oculos velaures, vel mo-
destiam volui, prodesse discentibus co-
natus sum, quod si non obtineo, faventes
tamen VOS Judices spero: cum licet
vires defint, sit tamen bona lau-
danda voluntas.



INDICULUS CONTENTORUM.

* * *

<i>Abortus embryonis descriptus</i>	pag. 34. 37.
<i>Aër an misceatur sanguini foetus?</i>	40. 43.
<i>Arteriae umbilicales</i>	33.
<i>Auctoris opinio de vera causa partus</i>	94.
<i>Auctoris observationes signo * passim indicantur.</i>	
<i>Aquae in utero praegnante diversae ab aquis quibus innatat foetus</i>	52.
<i>Caput infantis quomodo comprimatur in partu</i>	73.
<i>Cinguli usus in puerperis</i>	80.
<i>Connatum esse coitus desiderium & sobolis amorem</i>	102.
<i>Conclusio</i>	103.
<i>Conservatio duplex hominis</i>	102.
<i>CRANII (Theodori) hypothesis de diversi sexus prima formatione</i>	28.
<i>Conceptus, nativitatisque dies in quibusdam infantibus notatus</i>	53.
<i>DRELINCURTII & GRAAFVII sententiae conciliatae</i>	18. 20.
<i>Foetus e Fallopiana tuba exsectus unde nutriatur</i>	28. 38.
<i>ejus in utero situs</i>	49.
<i>in utero motus & inversio</i>	50. 51.
	<i>galeatus</i>

<i>galeatus: & una cum secundinis</i>	
<i>integris exclusus</i>	79.
<i>mortuus diu in utero restans</i>	55.
<i>mortuus cur difficiliter excludatur</i>	83.
<i>ejus in utero jam demortui certum</i>	
<i>signum</i>	88.
<i>Funiculi umbilicalis nodi & quid inde</i>	33.
<i>convolutio</i>	77.
<i>compressio</i>	40. 42.
<i>religatio & decidentia</i>	91.
<i>Furor uterinus</i>	11.
<i>Genitura vermiculis scatet microscopio</i>	
<i>detegendis</i>	25.
<i>& quid inde</i>	26. 27.
<i>Infantes quomodo referant parentum</i>	
<i>vultus</i>	24.
<i>Imaginationis efficacia</i>	7. 25.
<i>LAMIUS Medicus negat foetum ex o-</i>	
<i>vo produci</i>	21.
<i>Lac versus mammas quomodo fluat</i>	101.
<i>Libido quid sit in mare</i>	7.
<i>quid sit in foemina</i>	9.
<i>Locchiorum fluxus & quid inde</i>	100.
<i>Matre mortua natus infans</i>	84. 85.
<i>Meconium quid. ex ejus abundantia cal-</i>	
<i>citrare foetum intra uterum</i>	57.
<i>Membrae foetum involventes quomo-</i>	
<i>do e placenta primum emergant</i>	44.
<i>quomodo rumpantur</i>	71. 72.

<i>Muliebre semen : & quid sentiendum de eo</i>	14. 15. & seq.
<i>Mulieres menſe duodecimo foetus ſanos parientes, & quid de eo cogitan- dum</i>	55.
<i>Naviculae dilaceratio & quid inde</i>	74. 75.
<i>Os uteri ejusque clauſura</i>	30.
<i>ejus exploratio & quid inde</i>	30. 31.
<i>ejus apertio quomodo fiat</i>	32.
<i>Ovulum fabae inſtar germinat</i>	35. 36.
<i>Ovula mulierum quotuplicia</i>	19.
<i>Partus dolores ſive labores diverſi & qui- bus nominibus a noſtris nuncupentur</i>	65.
<i>ejus cauſſae diverſae</i>	56.
<i>Placenta accreſcens orificio uteri</i>	45. 46.
<i>quomodo formetur</i>	34.
<i>ejus ſitus in utero varius</i>	47. 48.
<i>Priapiſmus quid ſit & quid inde</i>	8.
<i>Similitudines illuſtres</i>	32. 35. 58. 95. 102.
<i>Terminus geſtationis foetuum in diver- ſis animalibus</i>	52.
<i>Uteri cum annexis ſimulacrum demon- ſtrationis gratia conſectum</i>	4.
<i>Uterus inſtar ventriculi vomiturientis</i>	58.
<i>ejus in partu commotiones robuſtae</i>	64.
<i>ſitus & habitus in muliere partu extincta obſervatus auctori</i>	69.
<i>Venae num pulſent ?</i>	39.

LECTOR CANDIDE.

POsteaquam aliquid hîc chartae superesset, nolui illi periturae parcere, sed natas quasdam inter taedia correcturae typographicae cogitationes, quasi notas inserui, non ut contradicerem quidquam amico auctori, cujus humanitati debeo, quod nominatim in hoc scripto compeller; sed ut ansam praeberem L. B. meditandi de quibusdam rebus, quae nocitura interim sunt nemini. Praepostero autem ordine ab ultimis versus initia retrogrediar; paratus & reliqua a Cl. Viris praelecta in hac anatomicae, quae huic Upsalensi Nosocomio si non ipsa jecit prima fundamenta, modum saltem & qua ratione jacerentur designavit, publicae dare luci, cum cognovero hosce conatus non plane infelicitè cessisse.

Pag. 105. *Humanum servamus genus.* Sapientissimo mortalium omnia videbantur vana, credo ut doceret nos, esse expectandam aliam & meliorem post hanc vitam: Quam cum ignorarent Ethnici, tamen & inter eos, eloquentes viri, descripserunt humanae vitae misérias plurimis verbis, sed obsecro cui bono! harum enim rerum attenta consideratio, non nisi languidiores reddere nos potest, ad peragenda hujus vitae necessaria munia. Itaq; mihi quidem perpulchri videntur versiculi Graeci Juliano Imperatori adscripti: *Ἡδέα πάντα κέλευτα λάχεν βίος*: &c. *Jucundas*

„cundas omnes vias sortita est vita; in urbe
 „mediâ gloria, sodalitia occultae in aedibus
 „dolorum medelae, ager oblectationes ha-
 „bet, lucrum navigatio, peregrinatio scien-
 „tiam, ex nuptiis domus concordia, non
 „nuptis vitâ semper secura, munimentum
 „nascitur patri filius, innanis prole carenti-
 „bus metus, robur juvenus, senectus pru-
 „dentiam novit praestare. Unde animo con-
 „fidens vive, & planta genus. Epigr. Gr. Lu-
 bini cap. xii. lib. i.

P. 104. *Bruta animantia pro suis foetibus vitam negligunt.* Sunt & in hoc argumentum amoeni Graeci versiculi lib. ante cit. c. 87. in philostorgiam, Alphaeo quodam auctore, de Gallina unâ cum suis pullis quos fovebat frigore enecata & obrigescente. Χειμερίαις νιφάδεσσι παλυνόμενα τιθὰς ὄρνις, & quae sequuntur. Hiemalibus nivibus humectata, „mansueta gallina pullis soporiferas circum- „fudit alas, donec illam caeleste frigus per- „didit. Certe permansit aetheris caelestium „oppugnatrix nivium. Progne & Medea in „inferno erubescite matres, avium opera „discentes. Non ignotae fabulae. Medea enim cum Jasone invitis & desertis parentibus connubium iniit. Postea amore in odium & iram converso, & facto divor- tio Jason Creontis filiam duxit. Quam injuriam Medea crudeliter ultâ, non solum filiam Creontis incendio perdidit, sed etiam suos ipsamet liberos jugulavit. Adeo ira,

amor, & crudelitas in ea exarserant. Tereus vero Thracum Rex, cum Atticae Progenes uxoris suae sorori Philomelae, linguam praecidisset, illato prius stupro, hac immanitate, & cupidine ulciscendi commota Progne, filium communem Ityn dilaceravit & epulandum patri apposuit. Referuntur fabulae Metamorph. lib. 6. fab. 7. & lib. 7.

P. 102. *Quemadmodum semina germinant.* Illustris est & usurpata optimis scriptoribus & meditanda saepius hominis cum planta similitudo: Glauci Hippolochi filii, decretoria pugna jamjam cum Diomede pugnaturi apud Homerum sequens est oratio, Zenoni gravissimo magistro Stoicae philosophiae, saepius citata, uti est apud Laërtium:

Tydide magnanime cur genus percontaris?
Quale foliorum genus, tale & virorum.
Folia alia quidem ventus humi fundit, alia item sylva

Germinans producit; Veris autem succrescunt tempore.


Sic uirorum genus: hoc quidem nascitur, illud vero denascitur. Iliad. z. v. 145.

P. 59. *Qui unquam praesens fuit primiparae.* Est & hujus rei elegans apud Oppianum descriptio Venat. l. I. p. 34. vertente sic „Rittershusio. Ut autem cum qua puella decimum circa mensem lunae primipara, partitionis doloribus percussa & solvit capillos, & disrumpit ornamenta ab uberibus, ac discincta miseraque & absque calantica

discurrit

discurrit passim per aedes & afflicta labore, alias quidem ad vestibulum tendit, alias vero in cubile pergit, nonnunquam etiam in pulveribus projecta ejulat, roseas unguibus lanians genas. & quae seq. est autem calantica - - - Verum dic sodes cui tandem farcimus hosce nostros centones? Cum medicum de quo hic agitur argumentum parum ista omnia spectent. Itaque ad alia.

Pag. 91. Mentio fit *funiculi umbilicalis*



exarefacti, cujus hic quaedam adumbratio inferiur.

A. Arteriae umbilicales forfice ab obstetrice detruncatae, & per tunicam transparentes.

B. Vena umbilicalis supra ligaturam conspicua.

C. Ligatura ab obstetrice facta.

D. Cavitationis pars concava abdomen versus.

E. Cavitationis pars convexa.

F. Tunica vaginalis tria haec vasa includens.

G. Extremitates arteriarum, sponte separatae.

P. 46. *Portalii observationum mentio fit praecipue obs. 2, 39, 41, 51. &c.* Gallice scripsit ediditq; easdem Parisiis anno 1685. Vir in praxi versatus, ut facile patet, non oscitanter referens quae est expertus, ingenueq; errores etiam proprios revelans. Habet autem in animo auctor hujus dissertationis HOORNIUS, typis hunc denuo evulgandi, sed versum in Latinam linguam, superfluis si quae sunt rejectis, concinniozem, illustratumque observatis propriis translatoris: Interim unam vel alteram ex observationibus citatis hic inseramus: praecipue cum firment quae auctor de placentae situ docuerat. *Observatio itaq; Portalii II. sic sese habet:* Gravida octavo mense laborabat uteri haemorrhagia, id neglexerat initio; jam vero qui


ro qui octavus dies erat , prae debilitate moritura videbatur , omnibusque peractis sacris ceremoniis expectabant circumstantes ut efflaret animam. Portalius iussus tentare quae posset , unctis butyro recenti digitis e vagina cruoris concretas massulas separans , invenit aperturam interni orificii , exaequantem diametrum nummi Francici, dicti *Ecus blanc*, crassitie vero sua non ultra lineam fere. Porro cum sentiret digitis molle quoddam corpus , animadvertit id esse secundinam , quam sensim solvens ab uteri lateribus, membranas aqua plenas disruptit , facilique negotio pedem investigans foetus , extraxit eundem, nulla vitae signa prodentem. Mater fideliter curata , alimentosisque medicamentis saepiuscule & parum exhibitis, frequentibusque insuper clysmatibus recreata, rediit tandem ad sanitatem pristinam, exceptis capitis doloribus, qui paulo diutius illi durabant. *Observ. XXXIX. talis est :* Advocatur ad gravidam afflictam profluvio sanguinis jam per dies 19. sed ita aucto, ultimo die, ut prae debilitate non agnosceret circumstantes. Omnibus remediis frustra tentatis jam morituram praedicebant Medici , nisi artificiosa manu liberaretur a foetu. Portalius deprecatur invidiam si contingeret aegram in ipsa tractatione mori, tum insertis digitis, placentam animadvertit occludentem matricis

matricis orificium. Cum membranae nondum ruptae essent, facile inverti infans & pedibus extrahi potuit, sed erat jam mortuus. Solent in hisce casibus viscera puerperae ita relaxari, ut absque difficultate peragatur operatio. Sensus redierunt matri, sed denuo passa animi deliquium, continuis insuper agitata convulsionibus obiit, quod auxilium, uti videtur auctori, serius illi esset adlatum. Aperuerunt cadaver defunctae, absente Portatio, alii: uterum nitidum & a sanguine purum invenerunt, nihil autem, cujus culpam in medicum rejicere possent. *Addam & LI. Obs.* Gravida quaedam perviolentam uteri haemorrhagiam jam defatigata plane paraverat se ad moriendum, cum juberetur Portalius ea tentare quae profutura viderentur: unctis digitis explorans orificium, id dilatatum reperit ad diametrum 7. vel 8. linearum, idem & circumstantibus medicis sentire fecit; Introduxit postea indicem digitum, tum medium & anularem & reclusis sic visceribus, pollicem itidem, minimumque digitum sensim intulit & quasi cum quodam matricis, dicto speculo, distendebat, annulumque sic distrahebat, ut in fundum manu penetraret, sentiretque placentam quae circumdabat internum orificium, unde & dehiscente orificio orta ex disruptis simul placentae ramulis haemorrhagia fuerat. Separata placenta

ulterius digitos versus partem internam & posteriorem matricis detulit, ut contingeret membranam aqua distentam, qua unguium compressionem disrupta, aquae efflueret; ut ut orificium uteri manus ejus occupaverat. Facile tunc pedes infantis reperit; alterum deinde digitis prehensum attrahebat, quanta poterat celeritate, aspersaq; sub conditione, uti mos est, sacrata aqua, lustrabat. Postea involutum linteo extrahebat pedem femurque ad usque nates. Observans tunc ulterius cruris situm, id agnovit super ventre plicatum esse, quod si versus posteriora fuisset divaricatum, aut inferendae de novo nates fuissent, aut per inconsiderantiam confregisset crus infantis. Sed certus de illo quem dixi situ, trahebat & alterum crus firmiter audacterque, tum & corpus reliquum ad usque axillas; quas expediebat, manu dextra collo apposita posterius prope caput, sinistra vero pectori seu sterni applicata anterieus. Extractus sic tandem infans debilissimus erat, tum ob factam jacturam sanguinis, tum ob illatas in arcto transitu injurias: sunt enim in praeternaturali casu arctiores viae, & labore protracto diutius, inflantur quasi viscera & intumescunt. Secundinas jam ante separatas facili negotio extrahebat, infantemque prope focum positum & placentam adhuc adhaerentem immittebat vasi pleno vino calefacto, vinumque

que purum oculis naribusque ac auribus infantis aspergebat, linteoque; vino calente madido corpus totum involvebat, caepas contritas continuo applicabat ori & naribus, & linteum vino calido madens saepius admovebat scroto, nam puellus erat. Revixit itaque; & cum matre, perfecta sanitate fruitur. Reliquas observationes citatas mitto, utpote paulo prolixiores.

Pag. 34. Citatur Ruischii quaedam observatio, quae sic sese habet. Observatio XIV.




Superfoetationis exemplum. Uxor Chirurghi Amstelodamensis, anno 1696 infantem robustum & viventem peperit. Sex horis post hunc partum in lucem quoque edidit embryonem, cujus umbilicalis funiculus *A.* tot hydatidibus erat refertus, ut videretur quaedam concatenatio vesicularum aqueo humore refertarum: placentula vero *B. B. B.* (cujus hic

fere tertiam partem expressimus) tantae magnitudinis erat & crassitiei, ut in foetuum mensium raro crassior & major reperitur. Caput embryonis respectu corporis

reliqui ingentissimum : artus instar appositarum particularum rotundarum sese prodebant. Servatur totum hoc inter selectas alias anatomicas quasi reliquias in Cl. auctoris Museo.

Pag. 32. *Graafvii observationes* de mutationibus ovuli quas c. 16. de generatione Cuniculorum refert libello de Organis. Quae omnino sunt maximi momenti. Itaque meretur, ut ante oculos habeant tirones artis, quam in similibus instituendis experimentis observare methodum debeant. Ad quam excitare eos si possem, vellem, non solum ut emendarentur hae delineationes, quod quidem erit perfacile, sed & ut in ipsa facti historia si quid forte omissum alicubi fuerit, animadverteretur. Brevibus autem verbis res tota absolvetur. Eligit auctor cuniculos, quoniam & illorum nobis suppeditari copia potest, & coeundi tempora exacte no-



tare & dum plures simul enituntur foetus, quod deest in uno in altero examinare licebit. Praemitti autem debet dissectio cuniculi foeminae à mare necdum compressae, ut quae postea sequitur in visceribus mutatio observetur rectius. C. cornu extremitas seu oviductus principium. O. Oviductus gracili principio exortus serpentino tractu sensim sese dilatans & ultra testiculos

sticulos excurrens infundibulum *I.* constituit. cujus portio testibus *z.* annexa est, & cavitas *R.* testes excipit. Hisce praenotatis jam sequentia observata a se praedictus auctor docet.

§. Dimidia hora post coitum uteri cornua aliquantum rubicundiora erant : testium ova nondum immutata. In vagina aut cornubus nihil omnino seminis.

§. VI. hora. Ovulorum folliculi ad rubedinem vergebant, ex quibus acu pertusis materia lenta & limpida erumpebat.

§. XXIV. hora. In uno testiculo tres in altero quinque ovorum folliculi valde immutati erant : opaci scilicet & dilute rubicundi, & in media superficie perexigua veluti papilla hoc fere modo.



§. XXVII. hora. Uteri cornua cum oviductibus sangvineae magis, & infundibulum testes undique amplectebatur. Eminebant exiles papillae, per quas presso testiculo profusiebat limpidus liquor subsequente rubicundiore & densiore. Nulla in cornubus ova.

§. XLVIII. hora. Papillae eminentiores. Pressus liquor albuminis instar extillabat : subrubea substantia spissior ac ante, minus facile sequebatur.

§. LVIII. hora. In uno testiculo unum in altero quatuor immutati ; quibus dissectis materia quasi glandulosa reperta, in cujus medio exigua cavitas nullum notabilem li-

quorem continebat. Rugosa cornuum interna tunica admodum inflata splendebat.

§. LXXII. hora, sive tertius a coitu dies maximam mutationem exhibuit; Infundibulum testiculum undique arctissime amplectabatur; quo retracto in lateris dextri testiculo tres folliculi majores aliquantulum ac duriores, in superficiei medio tuberculum ad modum papillae exili foramine pertusum habebant. In folliculorum dissectionum medio cavitas erat prorsus exinanita. In oviductus vero dextri medio unum & in ejusdem lateris cornu extremo duo minutissima ovula sequentis fere magnitudinis inventa fuere, gemina tunica involuta, limpidissimum ubi acu pertundebantur liquorem fundentia. In altero testiculo tres folliculi magis lucidi minorique foramine pertusi videbantur, in quorum etiam medio tantillum limpidissimi liquoris adinventum: at quartus folliculus obscurior erat, nec quidquam liquoris continebat. Unicum autem ovulum in ipso cornu principio deprehensum prioribus simillimum. Unde patet ova jamjam e testibus exclusa aliis adhuc in restibus haerentibus decuplo minora esse.



T. Testiculus est, in quo tertio a coitu die folliculorum crassities & cavitates, in quibus ova delituerunt, apparent.

§. Quarto die in uno teste quatuor in al-
ro tres

téro tres globulos seu folliculos exinanitos invenit, & in utriusque lateris cornubus totidem ova praecedentibus majora, quae jam versus cornuum media provoluta erant. In testibus praeterea quatuor vesiculae nigricantes observatae, ex quibus apertis sanguinis grumulus eximebatur: id autem erat praeternaturale quid, quamquam & alias observatum saepius.

§. Quinto die in ovariis sex innaniti folliculi numerati notabili papilla praediti, per cujus foramen seta in cavitatem facile inferitur. Ovula hujus magnitudinis erant diversis uteri partibus tam laxè adiacebant, ut solo flatu quaquaversum propellerentur.

§. Sexto die in uno testiculo sex folliculos exinanitos, sed in ejusdem lateris cornu quinque tantum ova prope vaginam in cumulum quasi redacta: In alterius lateris testiculo quatuor folliculos exinanitos & in ejus lateris cornu unum tantum ovum repertum: vel quod undoso uteri motu, intestinorum motui peristaltico non absimili, deorsum versus vaginam delata foras propulsa fuerint: vel quod in folliculis consumpta ad uterum non pervenerint, vel alio quopiam modo sinistrum eventum habuerint: magnitudo ovulorum haec fere erat.

§. Septimo die exinanitos aliquot folliculos

los praecedentibus majores, rubicundiores, duriores perspexit : totidemque transparentes tumores sive cellulas in diversis uteri partibus : ex quibus apertis ova hujus magnitudinis eximebantur , ubi praeter internam tunicam & limpidissimum humorem nil conspiciebatur.



§. Octavo die in dextro unâ cellula, in sinistro duae : harum una duplo fere major erat altera, naturae quadam varietate, cum tamen omnia determinato partus tempore excludantur. Ova autem prius quam eximi poterant, limpidissimum suum liquorem effundebant prae teneritudine membranae. Itaque ova una cum utero elixavit auctor, & eorum contenta instar albuminis induerunt.

§. Nono a coitu die vetulam dissecuit. Cujus testiculi erant duplo fere majores, quam in junioribus. In dextro duos in sinistro quinque folliculos nuper exinanitos vidit, & praeter hos adhuc alios pallefcentes (praecedentis scilicet coitus nondum abolitos) tamen si plerumque tantum subcineritia puncta relinquant, quibus testiculorum debetur auctio. Postremi vero coitus folliculi, papilla obstiti, alii plani existebant. Cellularum substantia reliquis uteri partibus rarior ac pellucidior vasorum propaginibus intertexebatur. Apertis cellulis ova eximere non licuit,

licit; contentum autem instar crystalli limpidum in medio nubeculam raram exilemque innatantem habebat: Interna cellularum substantia, quae hypogastricà vasa recipit, prae reliquis magis tumida jam placentarum primordia exhibebat.

§. Decimo die ut alia praeteream minoris momenti, in cellularum medio rude & mucilagineum embryonis delineamentum veluti vermiculus delitescebat. Placenta quoque conspiciebatur, cui ovum mediante suo chorio annexum erat.

§. Duodecimo die embryo conspicuus in pectoris regione duo puncta sangvinea totidemque albescentia conspiciebantur, reliqua ob teneritudinem informia.



§. Decimo quarto die uteri cellulae majores, vasaque turgidiora erant: disruptis membranis amnio chorioque, embryo conspiciebatur capite praegrandi ac pellucido cum cerebello in apicem porrecto, oculi prominuli, os hians, etiam auriculae quodammodo dignoscebantur. Spina per dorsum albicante colore in longum protendebatur, quae circa sternum inflexa carinam referebat. In pectore duo puncta sangvinea cordis ventriculi erant, albescentia ad latera puncta pulmonum locovisebantur. In aperto abdomine subrubrum hepar, & albicans corpusculum cum annexa mucilaginea materia instar fili contorti ventri-



ti ventriculi ac intestinorum primordia : quae omnia in sequentibus majorem tantum molem ac perfectionem acquirunt.

§. Denique vigesimo nono à coitu die, qui est penultimus gestationis, ut reliquas dissectiones institutas praetereamus, ovarii folliculi albicantes exiles sunt & evanescent fere. Uterus vero non jam in cellulas distinctus, sed instar infarcti farciminis undique distensus erat, qui motu undoso, peristaltico non absimili ita agitabatur, ut foetus vaginae proximiores membranis adhuc obvoluti in lucem prodirent; idque adeo praepropere, ut nisi extirparetur uterus omnes haud dubie expellerentur, qui jam in dissecti uteri cavitate calcitrantes conspiciebantur. Membranarum uteri figura inflato per tubulum amnio, patet: ut & tubulo per foramina in albicante placentae parte conspicua in membranam urinariam immisso: ipsisque illis foraminulis inflatis, rubra placentae portio instar spongiae intumescebat. Haecce itaque prolixiora licet hactenus attexuimus, in gratiam praecipue eorum, quibus surgentia omnipotentis Creatoris jussu e limpida quadam aquae bulla animalium primordia, spectare; & haecce, non indigna naturae, ex parvis initiis sua maxima ordientis, laboratoria quasi, perspicere, non injucundum erit.

Pag. 28. *Cypriani observatio.* Est & ab aliis

aliis jam ante observatum foetus fuisse in
tubis Fallopiianis conceptos : ergo germen
foetus non est alibi quaerendum quam in
ovulo : hactenus recte ; & quidem foecun-
dato antequam ad uterum pervenerit ; hic
haesitant nostri auctores. Interim ut ole-
um huic disputationis igni adferam, non



aquam , inferam quam dedere Parisienses
observationem : *dans les Memoires de l' Aca-*
demie Royale des Sciences An. 1702. Quas,
quod hisce Bellonae turbis adhuc habere
nobis liceat, debemus Belgarum sedulitati
ac industriae, quidquid terrarum ingeniose
proditur,

proditur, statim recudentium divendentiumque. Est autem observatio Duverneji senioris, cujus miram in disseccando dexteritatem, & in interpretando facundiam, & mihi cum sociis mirari saepiuscule licuit, cum annis abhinc viginti Lutetiae Parisiorum, haerentes studiorum gratia, frequentissimae auditorum ejus turbae immiscebamur: figura itaque hic apposita foetum refert in dextra tuba, mucilagineo conditum quasi humore, inventum, ejusdemque ac hic, utcunque delineatur, magnitudinis situsque. *A.* matricis fundus. *B.* collum ejus. *C.* vaginae portio quae collum ambit. *D.* ligamenta rotunda. *E.* ligamenta lata. *F.* tubarum papilio, ejusque apertura. *G. G.* sacculus tubae dextrae apertus, foetumque quem continebat, deoperiens. *H.* foetus, cujus integumenta & muscoli ita exaruerant, ut intus latentia ossa fere omnia non obscure agnoscerentur. *I.* placenta una cum funiculo omnino desiccata; tum quaedam portiones & laciniae membranarum foetus. *K.* tubae pars inter uteri fundum & sacculum foetus intermedia, tenuis valde planeque occlusa. De ovulis foemineis hic sub litera *L.* adpictis vide jam supra pag. 19.

Pag. 25. *Fertur vermiculos observatos in genitura a Leeuwenhoekio, & esse hos ipsos rudimenta foetus.* De priori membro prius dicamus, de posteriori postea. Dari itaque ista

ista animalcula, jam ante & aliis innotuisse viris doctis patet ex iis quae refert Joach. BECHER ob varios in diversis Europae locis chymicos publicos conatus longe celeberrimus, in der Naerrischen Waeisheyt, part. 2. § 37. Doctor Theod. Craanens Microscopium 100000 kleine Thiere in einem Tropfen Wasser zu sehen. Addit Auctor: ich habe sie nicht gesehen, und ich lass allen Musterschreibern, Rechenmeistern und ihm selbst zu, wie er dieselbe zehlen will, & quae sequuntur. Quae tamen sollicitudo Dn. Leeuwenhoekium non retinuit. Incredibilem enim horum animalculorum multitudinem in lactibus unius aselli majoris (uti miölken as een kabeliow fisk) provenientem plus decies superare homines in universo terrarum orbe viventes, hoc fere modo demonstrat Epist. ad Regiae societatis Collegium Londinense exarata Delfis 25. April. 1679.

Pono, inquit, centum arenulas juxta se collocatas conficere longitudinem unius pollicis, lactesque unius aselli majoris habere magnitudinem quindecim pollicum

100

100

100

Fit igitur summa 1000000 arenularum in unius pollicis cubici magnitudine.

15

Fit

Fit summa 15000000 arenularum in magnitudine 15 pollicum, qualem magnitudinem lactes habent.

10000 animalcula in particula unius arenulae magnitudinem habente.

colligitur ergo

summa 150000000000 animalculorum in unius aselli majoris lactibus.

Conficiam etiam (probabiliter saltem) summam universorum hominum in terra degentium. Longitudo circuli majoris in globo terrestri sive ambitus terrae communiter dicitur constare ex milliaribus Germanicis 5400.

Jam vero ex proportionem Archimedeae diameter erit 1718 mill. Germ. sc.

22 -- 7 -- 5400 -- 1718.

Hi duo numeri (5400 & 1718) inter se multiplicati conficiunt superficiem convexam terraquei globi, vel secundum auctoris calculum, 9276218 milliarium quadratorum.

Ajunt globum terrestrem habere duas tertias partes aqueas vel marinas, & unam tertiam terreas, conficiunt ergo partes terreae, sive relinquitur pro terra aquis exstante 3092072 quadrata milliaria.

Ponamus (*porro inquit*) unam tertiam partem terrae non esse habitabilem

3092072

1030690

relinquuntur 2061382 quadrata milliaria pro terra habitabili. Incolarum vero numerum sequenti ratione inquiri: ponit Hollandiam & Westfrisiam viginti duo milliaria longam, passimq; septem milliaria latam esse

7

22

continet 154 milliaria quadrata.

Si jam terra habitabilis 2061382 milli-
arium quadratorum dividatur per magnitu-
dinem Hollandiae & Westfrisiae 154 mill.
quadratorum, erit terra habitabilis 13385
major Hollandia & Westfrisia.

Ait porro, in Hollandia degere 1000000
homines: & praeterea si quis, *inquit*, pone-
ret, partem terrae habitabilem undiquaq; a
tot hominibus incoli, quot Hollandia habita-
tur, cum tamen id minime fieri possit.

13385 major esset terra habita-
bilis Hollandia.

1000000 homines in Hol-
landia.

Dantur ergo 13385000000 homines in or-
be terrarum. Animalcula vero quae in la-
ctibus, seu semine masculo habentur, sunt
150000000000; Sole meridiano ergo cla-

rius liquet , animalcula in lactibus unius asselli majoris , plus decies superare homines in terrarum orbe viventes. *Haëtenus ille.*

Sed & à nostris cum diligentia in haecce inquisitum fuit. Nam cum Ulbsaliâ Leydam abiret anno 1702 Cl. Chr. STROEMMIUS Med. Doctor & Oerebrogensium nunc Practicus , inter alia proponebat sibi indagandum , qua ratione efficerentur ista microscopia Leeuwenhoekiana , quibus certe tot miracula debemus , ut cum iis novus quasi detectus orbis videatur litteratis , non aliter quam acui magneticae suum debent omnia pervestigantes nautae mercatoresque. Obtinuit autem curiosus sedulusque indagator haud ita difficulter , quod quaerebat in illo emporio Europae , nec inhumana erga hospites gente , praesertim cum neceret paulo diutius apud eandem moram. Habeo ab ipso confectum microscopium , quo detegi istae minutiae possunt : retulitque nupero scripto , sese jam eo pervenisse in hisce conficiendis vitris , ut credat Dom. Leeuwenhoekium non habuisse meliora , cum suas primum epistolas vulgaret : sibi que hosce vermiculos sub hac magnitudine , *prout ipse delineavit* , apparere : eosque contra liquoris sive guttulae torrentem niti dum vivunt , unâ cum eo vero abripi & devehî postquam desierunt vivere : adeoque certum esse dari hos



hos ipsos, & existere, nec oportere haberi pro volatilium particularum fumo, id quod intuentium oculis obversatur. *Haec ille.*

Quod autem attinet ad hinc deductas consequentias, notari primum meretur, quod cum humana proles in utero piscis vitam vivat, post aërem ita respiret, ut suffocetur aquis si immergatur, adeoque non minorem certe, quam ullum insectum metamorphosin subeat; utique hactenus non rejici debeat, imo concedi possit, ut naturae rerum conveniens, nec insolitus vermiculi in embryonem suppositus hic transitus; qui transmarinis quibusdam eruditis, credo, arrisit non ob aliam causam, quam ut ingeniis suis, veluti vento, ut de Graecis Romae degentibus olim Plinius conquestus est, receptas opiniones agitarent. Sed restant hîc quaedam dubia graviora. Et praeterquam quod in aliis quam genitura, liquoribus observentur similes his, vermiculi; etiam totum hoc, Logicus quis diceret, minus recte infertur: video infinita animalcula, ergo humani foetus rudimenta video! Nam ut concedatur, unumquodque animantium, imo & plantarum genus, dum maxime vigent, proprios sibi vermiculos continere, fovere, nutrire; Morus arbor bombycem, Indica ficus Cochinillam, aliud alios: non tamen sunt ista animalcula cum ipsis seminiis generum confundenda; *ty kâblmask är intet kâblfrö.* Verum

rum seria hujus rei discussio vel expectanda a Claris Viris, qui hanc amplectuntur opinionem, vel alias erit reassumenda. Nunc quae restant absolvemus.

Pag. 17. *Fallopianae tubae* cum suis apicibus; quas ex antiquis scriptor quidam *navium taeniis, (*smâ flaggor*) ad malorum cacumina volubilibus assimilat, quod hae laciniae, pinnulae versatilis more ad omnem veneris auram impellantur, & quasi volitent. In extinctis corporibus collabuntur &



flaccidae apparent tenuesque. Sed docuit nos jamdudum **COUS SENEX** non esse eundem

* *vid. Drelincurt. Exper. anat. de Tubis uteri.*

eundem viventium animalium habitum & demortuorum. Dn. BIDLOUS in specioso suo Theatro anatomico per Cl. artificem & Pictorem Amstelodamensium Larissimum, in hunc fere modum hasce tubas vel cornua, si mavis, delineari curavit. Ubi praecipue lacertosae illae & lacinirosae fibrillae: *Modertrum mornes Loefwerken eller Kiöttäger, liksom Fransar*) repraesentantur contentae & expansae & in figura secunda copulatae testibus, semen ab ipsis quasi corripientes. Devolvi autem per hosce canales ovulum etiam in homine, constans hodie est opinio inter auctores, & sentiri ovuli hunc motum a mulieribus in dextro latere vel sinistro tertio vel quarto a congressu die, in prima praecipue ingravidatione, credo asserentibus; mihi que persvadeo foeminas ingenio & attentione valentes postquam hasce partes rite dissectas viderint, cognoverintque; & quas exercemus nos inter controversias perceperint, posse in semetipsis circa totum hoc negotium plurima animadvertere, de quibus Viri, non nisi per quandam nebulam ut ita dicam ratiocinantur, & andabatarum more depugnant.


Ovi pennatorum passim mentio fit. Ovum, & alimenti indigo ventri cibus optimus saluberrimusque, & animo veri cupido digna inquisitioni materies, ex anatomia comparata innotescet, postquam exilitate sua in
corpo-

corporibus humanis investigatorem eludit. Historia itaque incubationis ovi & pulli procreationis, saepius relegenda est, sed in naturae libro. Nam verissimè Hippocrates lib. de nat. P. *Increscit avis in ovo & eodem prorsus consimilique modo in membra disscitur veluti puer.* Postquam autem ista transmutatio fuerit jam aliquoties usurpata oculis, tum legendi per otium sunt, qui circa idem hoc argumentum consignarunt observationes suas vel alienas. Et inter Graecos quidem supersunt, quem nominabam HIPPOCRATES, & post eum ARISTOTELES, & ex eo PLINIUS inter Romanos, & post renatas in Europa litteras ALDROVANDUS & COITERUS, ambo Itali, & post eos Æmyl. PARISANUS Medicus Venetus: & praecipue Hier. ab AQUAPENDENTE, ejusque cōmentator egregius Guil. HARVEUS Anglus, & ex eadem gente LANGLY, ALDES, NEEDHAM: Et e Dania STENONIUS: Et inter Germanos SCRADERUS & VESLINGUS: Et deniq; Bononiensis MALPIGHIUS, qui in ovo nondum incubato, foecundo tamen pulli carinam candidis delineatam zonis innatare suo colliquamento, adjutus microscopiis detexit. Quos omnes praenominatos scriptores seorsim multo labore investigandos, Lectoris insigni commodo, in unum consarcinavit volumen Gerhardus BLASIUS Belga.

Ovi gallinacei per medium dissecti delineatio.

K. Cortex, putamen, testa; durum, tenue, friabile, porosum integumentum, colore in gallinis candido, & in ovo recenti ab adhaerente quodam polline scabrum.

I. G. E. C. membranae s. tunicae cortici proximae. Prima crassior & firmitior. Subjecta huic & liquoribus contigua mollior, vitelli vero membrana tenuissima. Tum albuminis tenuioris tunica post aliquot dierum incubationem inspicenda: colliqua-



menti deniq; involucrum & albuminis crassioris membranae ita tenues, ut visum fere fugiant. *H.* Cavitas aërea in obtusiore parte ovi prope putamen efformata, quae in majorem, ubi incubari ovum coepit, peripheriam dilatatur; e directo subjectae respondens chälazae ante incubationem, nam postea sese vitellus, quod mirum est, convertit. *D.* Chälazae sive grandines; alba, concreta, nodosa corpora, vitelli membranae appensa, & quasi albuminis essent numerosae tunicae, hinc

hinc inde in utroq; extremo contortae sunt in chordam nodosam qua vitello adnectuntur; vel quasi duo cardines hujus microcosmi, mutuo oppositi vitellum in centro ovi firmantes. *F. E.* Albumen; ovi candidum; Lac avium dictum. Frigidum est lentumque. Est & duplex propriis secretum & involutum tenuissimis membranis: alterum liquidius; alterum crassius & viscosius, quod undiq; tegit & circumfluit croceum vitellum. *B.* Vitellus, a vita dictus, quasi inde pullus vivat, ovi luteum a colore. Mollissimus est liquor, totusq; oleosus ut experimentis pharmaceuticis constat, quemadmodum & vegetabilium semina fere omnia oleosa maxime sunt. *A.* Cicatricula quasi pedusculi vestigium esset quo ante adhaeserat ovario (*ägg-ögar*). Est macula referens pupillam aviculae, exigua, rotunda, plana, vitello impressa & adnata, omnibus ovis, etiam a prima eorum origine in vitellario, inexistens: in ovo recens edito minor in requieto grandior: ex quo quasi centro germinatio prorumpit; neglectim habita plurimis scriptoribus, cum sit totius ovi pars praecipua, & cujus gratia, si ita loqui liceat, reliqua omnia sunt conformata. Ovum itaq; aequae ac omne vegetabile, forsitan & minerale semen, machina quaedam est & organon, ex pluribus compositum particulis ad unam actionem conspirantibus. Sed alias plura.



Ulm hisce huc usq; deductis, Typographus perofficiose, si quid imprimendum insuper haberemus, rogaret, commoti hac facilitate, & spe praeterea ducti LECT.

BEN. qui circa argumentum, minus adhuc tritum nostris, cuperent instrui, adjectas aliquot pagellas, eodem quo caetera favore perlecturos; constitui-
mus ad telam haecenus concinnatam adnectere hoc segmentum exoticum, veluti simbriam quandam, ornamenti gratia. More usitato etiam nostris foeminis tum plebejis, tum urbicis, quarum vernaculis indumentis, & e crassiori lana domiconfectis, ut plurimum:

Purpureus latè qui splendeat, unus & alter
Assuitur pannus.

Quamquam libellus, à quo haec mutuo sumimus, plurimorum teri manibus integer mereatur; ita cuncta obstetriciam artem spectantia clare tradit & perspicue & ingenue; tamen cum is obuius omnibus e nostris non sit, partem saltem ejus hic recenseri non moleste ferat B. L. Deniq; totum hunc conatum nostram obnixè rogamus B. L. in partem bonam interpretetur: neq; otio quo abdamus, abuti nos censeat, cum verbosius disceptemus de iis, quae raro seriò, communiter non nisi per jocum agitare is soleat: - salutos

Qui captat risus hominum famamq; dicacis.
Neq; factum male putet, si nos qui pro patriae salute & incolumitate, & pace aequa, hostibus iniquis opponere pectora non valeamus; domi interim stantes vel voce applaudamus pulcherrimis
faci

facinoribus, fortissimisque rebus gestis nostrorum, vel excolamus ea pro virili, quae ad bonas artes spectant. Quid enim, obsecro, si vel unum puerulum hisce praeceptis, vel matrem unam eripi periculo contingeret, An indignum laude quis existimet: Civem vel hoc servasse modo?

HENRICI DAVENTRII
Art. Obstetricandi Cap. XLIX.

Primo omnium *obstetrix, parturientem sine mora tactu explorare debet: hoc ipsum si negligat, certissimum est ignorantiae argumentum, aut infidelitatis ejus, ex ignavia ut plurimum & arrogantia fluentis, utpote quae aut non agnoscit, aut non metuit obliquati uteri pericula.*

Parturiente jam tactu explorata *obstetrix* ex isto tactu cognitionem situs uteri capere debet, & quid inde consequatur: idcirco si quis ab ipsa rationem exigat, oportet illam eidem indicare *locum oris uteri*, an situm sit illud *super mediam pelvim?* an in *antica* ad ossa pubis? an in *postica* ad vertebrae sive os sacrum? an in *dextro* an in *sinistro* latere?

Si *obstetrix* asserit: os uteri hiulcum super mediam pelvim situm esse, simul etiam indicare poterit, *quàm late illud pateat, & quid in eo praevium exhibeatur, caputne, an aliud membrum? seu aquae protuberantes?*

Si vertex infantis in ostio oris uteri, atq; os uteri super pelvim, aut in pelvi situm est, tunc

tunc solum expectandum, dum Natura parturientem dolorum impetu ad laborandum concitet; *qui quoadusq; cessant, aut pigriores sunt, non opus est, ut parturiens laborando defatigetur, sed dolorum impetum secure licet expectare.*

Si os uteri super mediam pelvim situm fuerit, *obstetrix* etiam indicabit: *altiusne an demissius illud situm sit*: si altius; magni capitis, aut parvae pelvis argumentum est: contra si demissius jam descenderit; parvi capitis, aut amplae pelvis indicium est, hocq; posterius faciliorem partum promittit, quam prius.

Si os uteri in media quidem pelvi situm est, neq; tamen vertex in eo sentitur: e contrario si caput oblique aut facie praevia exhibeatur, aut vena umbilicalis, aut pes juxta caput prodeat, scito: *Obstetrici non licere, ut parturienti sine auxilio otiosa assideat*; quod si nesciat, quid hoc rerum statu agendum sit, tunc non callet artem suam: illam utique non oportet cessare, quoadusq; remotis quibuscunque aliis membris aut partibus *solum caput in ostio versetur*, ita ut vertex aut facies sola in ostio persistat: praestaret quidem solum verticem in ostio praevium exhiberi; attamen faciei soli valide prorumpenti consultius est locum in ostio concedere, quam eam violenter velle loco movere; *violenter*, inquam, alias si *leniter* ac sine attritus aut laesionis periculo loco moveri illa poterit, vertexq; in ostium promoveri, tunc ingens progressio facta est.

Si

Si *obstetrix*, quae prius indicaverat: hoc vel illud membrum juxta vel ante caput in ostio exhiberi, brevi post sine longo temporis dispendio refert: *se membrum simul cum capite oblatum retrusisse, solumque caput vertice, aut, (si quidem aliter non potest) facie praevia in ostium produxisse, tunc bene fecit, & prudenter negotium gessit: sin longas nectit moras, & observetur, membrum illud simul cum capite exhibitum (seu manus sit, seu pes, seu vena umbilicalis &c.) ulterius progredi, nec obstetricem illud reducere posse, nec ulteriorem prolapsum praecavere, tum ipsa non callet artem, nisi assiduorum dolorum vigore impediatur, ut non suppetat illi tempus membri simul prodeuntis retrudendi: atq; in tanto dolorum fervore tantum non imminet periculum; siquidem aquis repente extuberantibus, membranisque citò ruptis *obstetrix* mox post effluvium aquarum suo quidq; ordine disponere potest: sin ista doloribus pigris languidisq; adhuc nesciat membrum exhibitum post caput retrudere, tunc inepta est: & metuendum, ut porro negotium expedire possit, quare in illius opera non acquiescendum.*

Ore uteri in pelvim directo, si *obstetrix* ait: se tactu nec caput, nec nates posse sentire, nihil in ostio exhiberi praeter aquas, quae coeperunt extuberare, *isthaec partus difficilis indicia sunt*: Si igitur *obstetricis* tuae dexteritati confidere non dubitas, bene est; alias
habi-

habiliior tibi quaerenda; *infans*, enim, *trans-*
versus prodit, quare mox post aquarum efflu-
vium caput in ostium producendum, aut *in-*
fans pedibus extrahendus est, nisi matrem & in-
fantem mortis periculo exponere velis.

Si os uteri recta in mediam pelvim qui-
dem tendat, sed loco capitis altera solum
manus, pes, genu, cubitum, vena umbilica-
lis, aut manus una cum pedibus prodeant,
idem, quod modo exposui, periculum immi-
nere memento: deliberandum igitur: *an*
praesenti obstetrici negotium committere liceat
necne? si licet, bene est: sin minus; *matura-*
to opus est, nisi matrem cum infante mortis pe-
riculo subicere velis, quae mox post effluvi-
um aquarum cum foetu servari quidem potest.

Si, ore uteri convenienter super mediam
pelvim sito, infantis podex praevius exhibe-
atur, tunc minus periculi imminet, siquidem
ille *cum valentioribus doloribus complicatus ex-*
cludi quidem potest: At verò si *obstetrix* egregie
callet artem, sub aquarum effluvium infantis
situm facile mutare, pedesq; in ostium pro-
ducere potest, unde faciliior adhuc enixus.

Si, ore uteri dicto modo convenienter su-
per mediam pelvim sito, non nisi alteruter
pes, aut bini pedes prodeant, tum parum pe-
riculi est; si *obstetrix* dexteritate pollet, sub a-
quarum effluvium *uni pedi prodeunti alterum*
facile adjungere poterit; quod si mox post ef-
fluvium aquarum effectum dare nesciat, tunc
non

non callet artem, & matri periculum, idemque majus adhuc infanti affert; hic enim, licet vivus tandem prodeat, facile tamen laedi, delumbari aut luxari potest, nisi caute inflectatur, dum in ostium producitur.

Si *obstetrix* post tactum ait: *infans nimis alte adhuc situs est*: neq; novit exponere, quomodo aut quo loco os uteri situm sit, aut quid in illo praevium exhibeatur; dictitans: *intempestivum adhuc, & morandum esse*, usque dum uterus cum infante ulterius delabatur, antequam res istae cognosci queant: interea si observatur, parturientem doloribus ad laborem concitari, tunc in mora illa non licet acquiescere: *obstetrix* enim sub ea ignorantiam suam conatur abscondere, sperans, postea omnia feliciter adhuc *forsan* eventura esse; sed male *forsan* evenire possunt: maturè igitur *peritior obstetrix* aut *Chirurgus vel Medicus obstetricans* quaerendus; siquidem os uteri alte suspensum esse res arguit, quia scilicet ipse uterus oblique situs est, aut infans in utero prave versus prodit: utrumque ab initio statim commodius corrigi potest: cunctatio autem & matrem & infantem mortis periculo exponit, quapropter vigilandum est.

Si *obstetrix* refert: os uteri super mediam pelvim non situm, sed in antica ad ossa pubis, aut in postica ad os sacrum, aut in latere ad ossa coxendicis nimis conversum esse; tum periculum imminet: quaeritur igitur: *an os illud*

illud parum saltem ad ista ossa vergat? an verò multum eò declinet, altiusque illis objaceat? si parum saltem eo vergat; tunc minus periculum est, atque si obstetrix usu rerum & exercitatione valet, negotium rite expediet, & abjecta omni cunctatione rem conficiet: sin de cunctatione verba habet, totum negotium Naturae committens, tunc imperita est aut ignava, in qua acquiescere non licet, periculum enim in mora est.

Si obstetrix ait: os uteri altius & validius huic vel isti ossi objacere, tunc a Natura enim noli sperare; id enim & matri & infanti periculosissimum: si obstetrix tua usu & exercitatione valet, ut arte partum maturare sciat, tum abjecta omni cunctatione omnem curam atque operam ad id conferat, consultò tamen, caute, prompteque negotium expedi- at: cunctatio nihil commodi, sed multum mali quidem inferre potest: Si rei tam gravi atque arduae obstetricem praesentem parem esse addubites, tum peritior tibi quaerenda, aut ad auxilium periti-obstetricantis Chirurgi confugiendum erit; talis enim uteri positura mortem asferre solet infanti, immo & parturienti nonnunquam, ac rarò quidem utriusq; vita servatur, si soli Naturae id negotii detur, aut non nisi vulgares suppetiae ferantur; quum contrà, si ejusmodi parturienti manu exercita auxilium subministretur, partusque arte acceleretur, & mater & infans servari possit.

Utero seu recte seu plus minus oblique posito, si membranâ ruptâ membrum aliquod (sive manus, sive pes &c.) exclusum sit, id indicat: *partum confestim ac sine mora excludendum esse*, quod si *obstetrix* arte e vestigio effectum dare nesciat, persvasa, id a dolorum efficacia expectandum esse, tum ocyus exercitior accerseri debet: quid cessas? periculum subinde ingravescit, opera fit difficilior, cruciatus parturientis aggravantur, viresque ad ferendos dolores deficiunt: *cunctando remis velisq; plenissimis in discrimen fertur parturiens, sed maturata partus exclusione periculum subterfugit.*

Si *obstetrix* utero adhuc alte suspenso, membranisque nondum ruptis periculum indicio suo mature detegere omisit, si uterus jam delapsus & simul cum infante in angustias compulsus est, si dolores vehementes sine successu irruunt, *tum nullum temporis momentum praetermittendum est*; rarissime enim fit, ut periculo, quod incurrit, se sciat expedire, qui illud mature praevidere & subterfugere nescivit: hoc casu in *talis obstetricis* opera acquiescere noli, sed, si rebus tuis consultum vis, peritiorem adjungito, quo & matris & infantis, aut alterutrius ad minimum vitae servandae prospiciatur.

